

14

HARVARD COLLEGE LIBRARY  
FROM THE  
HARVARD - YENCHING  
INSTITUTE  
APR 29 1930

Ch L 3203,83

Ch L 3203 /3142/83



江南通志卷三十八

輿地志

壇廟 二 祠墓附

蘇州一府

蘇州府

社稷壇在府城盤門外

風雲雷雨山川壇在盤門外

勅建先農壇在郡學之東壇旁有耜田歲以仲春亥日行耕藉

禮

郡厲壇在虎邱山前

縣曰邑厲

里社鄉厲二壇在各鄉保

關聖廟在府治卧龍街武狀元坊雍正五年奉

旨追封三代公爵全日祭于後殿

哈佛大學哈佛葉宗  
圖書館珍藏印



城隍廟在府治武狀元坊

勅建八蜡神廟在府城

劉猛將軍廟在府城中街仁風坊

以上壇廟所屬縣皆如制

旗纛廟在府城齊門教場內舊在蘇州衛治

福吳富農龍神廟在府城元和縣署西雍正五年遵建

至德廟在閶門內祀吳泰伯漢永興二年建於閶門外

雁宕村南吳越錢氏移建於此明宣德中郡守况鐘修

國朝康熙二十四年巡撫湯斌修附明周忱重修至德廟記

宣德五年秋七月禮部郎中况鐘伯律奉璽書擢守於蘇州視事之日吏以囚犢進見民之繫於獄者凡千餘人尚爭務勝交相訐訟有經十餘載而未決者伯律姑置弗問越明日率郡之父老進謁於吳泰伯廟見其堂宇傾仆垣墉頽圯吏民奉事弗虔乃喟然歎曰民不見德宜乎刑之不清也是非郡守之先務乎即日命工度

材撤其舊而新之曰堂曰室曰門曰廡為屋凡四十楹繚以周垣堅以甃甃不十日而告成復率父老潔牲醪祇祀於廟居人過客瞻望咨嗟於是獄之繫囚交相愧悔曰泰伯以天下讓民無得而稱焉吾輩所爭僅錐刀之末耳何重貽郡侯之羞乎皆相與俯伏庭下自服其辜不數日而獄以空虛告予時奉命巡撫於江南列郡至蘇州祇謁祠下父老以其事告且曰昔者狄梁公以冬官侍郎為江南巡撫使毀吳楚淫祠千七百所而此廟則在所留而不毀者去今千年得吾郡侯葺而新之巡撫之來又適當其時吳民觀感興起自今其無復爭競之風乎予乃登其父老而告之曰方泰伯之奔吳也斷髮文身示不可立然荆蠻義之從而歸之千餘家遂端委以臨其民是欲辭富貴而富貴隨之及其後世夫差狃於必勝窮兵黷武破楚困齊欲霸天下卒之國亡身戮妻子為虜是欲求富彊而失其富彊矣然則吳地數千年之富庶由泰伯之三讓有以致之也其鬪爭之成風者亦由夫差之好勝有以啓之也爾民欲為泰伯之讓乎欲效夫差之爭乎一則廟食萬世一則貽笑千載其得與失必有能辨之者孔子曰能以禮讓為國乎何有則予與太守期望於吾民之意父老曰善請以是為記遂書於麗牲之石使四方之來謁者咸有所觀感而興起焉豈獨蘇州之民而已哉



周康王廟在府治市曹橋相傳晉隋間嘗戮人於此因立廟取成康刑措意

夫差廟在姑蘇山東北又常熟崑山皆有廟祀

水平王廟在西洞庭消夏灣祀太湖水神

水仙廟在子城東南祀古蒼龍神相傳卽柳毅也又一在城西雁岩村

春申君廟在府城內西北祀楚黃歇

蕭王廟在府治樂橋祀漢蕭何

會稽太守廟在府治穹窿山南祀漢朱買臣

韓將軍廟在府治官瀆橋南祀漢韓說

顧元公廟在府治黃天蕩東祀晉驃騎將軍顧榮

東山廟在府治虎邱山祀晉司徒王珣西山廟祀王珉

又崑山景德寺亦有王司徒祠

聖姑廟在包山晉王彪二女有靈異相繼卒後人祀之

靈濟廟在府治陽山澄照寺祀白龍神宋熙寧間建

韓蘄王廟在府治南禪寺左妙隱菴祀宋韓世忠明嘉

靖中建舊在靈巖山西麓者今圯

忠烈廟在府治天平山白雲寺宋范仲淹先祠

周孝子廟在府治大街祀宋周容

楊和王廟在府治習義鄉祀宋將楊沂中

晏公廟在葑門西營內神在元時嘗陰翊海運封平浪

侯



羊太守廟在府治烏鵲橋南祀宋羊元保

太湖廟在吳江縣南醋坊橋側祀太湖神

順濟龍王廟在吳江縣長橋

盛將軍廟在吳江縣三都西祀三國吳司馬盛斌赤烏

初斌有功於吳江卒後邑人即墓立廟

昭靈侯廟在吳江縣治東祀唐刺史曹王明明唐太宗

第十四子為吳郡有惠政

周將軍廟在震澤縣七都祀三國吳周瑜

巫咸廟在常熟縣致道觀祀商相巫咸

劉太尉廟在常熟縣虞山西祀宋將劉錡

靈惠廟在常熟縣治東南祀周孝子容

惠應廟在崑山縣馬鞍山之陽祀崑山神唐中和二年

建宋崇寧間賜額

婁侯廟在崑山縣婁縣村祀吳陸遜張昭遜昭先後封

婁侯

張公廟在崑山縣東南三十里祀宋張方平

雙忠廟在崑山縣內祀明季殉難山西巡撫蔡懋德隨

州知州王燾

忠義祠 節孝祠俱在府城內 各縣俱如制

古聖祠在府治葑門祀逸民朱張

季子祠在府治西南錦塢峯下祀吳季札元至正間建

闕里分祠在長洲縣孔氏六十六世孫興豫建祀孔子



復聖祠在府治楓橋西十里祀顏子宋元豐中建今圯  
言公祠在學道坊祀子游

亞聖祠在東禪寺西祀孟子明萬曆中建

伍相國祠在胥門祀伍員舊在盤門內明萬曆中喬孫

伍袁萃移置今所又有祠在東洞庭山 附 明陳瑚伍公

廟記 吾郡東洞庭山楊灣里有伍公子胥祠焉公之廟

之立祠江上名之曰胥山今去郡西三十里地入太湖  
名胥口者即其處祠尚存而祠前古墓松檜參差相傳  
以為公葬其下楊灣之祠則里人奉為土神有事禱焉  
而又稱之曰胥王廟王爵之封始於宋高宗南渡時後  
人由此遂仍其號云王子夏山中士周宗魯述其建祠  
本末屬予記之伐石以俟今天下佛老子宮所在都有  
國家禁令扞格不得行而吾吳習俗楞伽之山無少長  
男女舟車鼓吹奉牲醴以徼福者春秋無間日至於聰  
明正直而為神者則或黍稷不馨廟貌不治淪落於荒  
烟蔓草之中嗚呼不有君子何以反其俗也唐狄梁公

廢江南淫祠而公之廟獨與大禹泰伯季札並垂天壤  
者何哉予嘗考公之為人其始也出萬死一生忍怨數  
十年而卒行其志其既也竭心於所事犯顏強諫被讒  
殺其身而不悔由前言之則為孝子由後言之則為忠  
臣豈非砥柱人倫而爭光日月者哉往者巡撫大臣治  
舟師習水戰大閱於胥口祠中必祭告然後入萬曆間  
某巡撫不禮公坐少頃若有撻其背者嘔血歸竟死一  
武弁守洞庭矢溲公墓旁入舟狂叫不踰時亦死乙酉  
秋黃蜚兵泊太湖將不利於洞庭夜見神火滿山疑有  
備也不敢動蓋其靈異如此嗚呼公之精誠氣馘足以  
感人者赫赫在天地之間豈其與山魃澤怪較長短爭  
有無而啗啞叱咤以禍福驚動恐懼人以食其土然匹  
夫匹婦多好以此稱公予故不得而畧也於是書其事  
而系之銘曰烈哉伍公萬夫之雄以子則孝以臣則忠  
沒為明神簡在蒼穹楊灣之里洞庭之東波濤喧豗草  
木蒙戎其來如雲其去如風神所憑依環堵幽宮子子  
周生即鹿林中震不於鄰而於其躬卜告於廟後吉先  
凶信而有徵神誘其衷乃樹斯碑酬德報功於千萬年  
廟食 攸崇

二戴祠在虎邱山祀漢戴德戴聖康熙間建



徐南州祠在府城天妃宮前祀漢徐穉

任使君祠在天慶觀祀漢會稽都尉任延

陸內史祠在府治益地鄉祀晉陸雲

慧感夫人祠在承天寺夫人陸氏梁衛尉卿僧瓚女僧

瓚捨宅爲寺寺祀夫人爲伽藍神號聖姑

潘博士祠在府治齊門東匯祀隋潘徽

五賢祠在虎邱山平遠堂祀唐韋應物白居易劉禹錫

宋王禹偁蘇軾明萬曆中建

陸宣公祠在府治五龍堂巷祀唐陸贄

韋蘇州祠在府學內左偏祀唐刺史韋應物宋景祐間

建

甫里先生祠在府治東五十里角直鎮祀唐處士陸龜

蒙宋嘉定間建元至正間重建

蘇公祠在府治滄浪亭祀宋蘇舜欽

國朝巡撫宋犖增建

韓魏公祠在至德橋南書巷內祀宋韓琦

呂東萊祠在府治元妙觀前祀宋呂祖謙

范文正公祠在府治義宅東祀范仲淹宋淳熙中建明

宣德中郡守况鍾重建

濂溪祠在府治萬壽寺西祀宋周敦頤明萬曆中建

胡安定祠在府治潘時榮巷祀宋胡瑗

二程祠在虎邱東祀宋程顥程頤



國朝康熙九年建

魏文靖祠在府治南宮坊卽鶴山書院祀宋魏了翁初  
賜第蘇州卽書院爲祠明宣德間改爲巡撫公署弘治  
中復建於左偏

朱文公祠在府治祥符寺巷祀宋朱子

張公祠在府治北寺東祀宋張載

宋公祠在府治閶門外祀宋宋恭

朱公祠在府治葑門祀宋朱壽昌

劉公祠在府治大街祀宋劉子翬劉子羽劉鞅劉琪

滕忠節祠在府治草橋祀宋滕茂實明洪武間建

張都南祠在府治狀元坊祀宋張日中

周武公祠在府治濂溪坊祀宋死節周興裔濂溪四世  
孫

潛公祠在范文正公祠內祀宋端明殿學士平江知府

潛說友咸淳間建

魏給諫祠在虎邱祀宋郡守魏庠

蔣密直祠在虎邱祀宋郡守蔣堂

三公祠在府治承天寺祀宋郡守吳淵吳潛趙與憲

范文穆公祠在石湖上祀宋參知政事范成大 附明王

蓋記 昔在有宋吾蘇入參大政者有兩范公文正當仁  
宗時開天章閣求治更張庶政將大有爲未一年

以小人不悅罷文穆當孝宗朝在政府兩月未及有爲  
以言者罷前宋之治莫盛仁宗南渡後莫盛孝宗皆銳  
意太平二公皆以身許國可謂千載之遇而皆不能少  
試其志嗚呼忠良不容於時自昔已然獨二公乎哉文



正子孫在吳中最盛所謂歲寒堂者有司春秋享祀不絕而文穆之後無聞焉觀其使金爭受書之儀舉朝皆悚有蘇子卿嚼雪之操繳還閣門張說詞頭有陽城裂麻之忠奏罷明州海物之獻蓋與孔戡之政同其在成都閱兵築戍獎勵名節間與陸務觀諸人賡倡風流餘蘊漸被氓哦而吳中民風土俗人情物態纖悉備見其詩用世之具素講於胷中而時莫之用非其君不用而小人尼之嗚呼其可惜矣吳城西南十里有浸曰石湖山曰吳山湖山之間廢壘隱然即所謂越城也文穆之別墅在焉其境最勝周益公謂天闕絕景以與其人而數世之後求其彷彿不復得所謂壽櫟天鏡閣玉雪坡皆已湮於荒烟野蔓之中過者傷之而孝宗宸翰碑石巍然獨存御史盧君雍家越來溪上少時數過其地與其弟約曰他日且將俎豆文穆於斯及為御史始克如志正德庚辰六月廟成肖公像於中移阜陵手書陷置壁間以辟風日歲時享祀如儀乃屬予記其事

鄭所南祠在府治能仁寺內祀宋鄭思肖

國朝順治間移置廣生庵

金仁山祠在府治天妃宮前祀元金履祥

顧原魯祠在府治卧佛寺東祀元顧愚

附 明瞿景淳記

顧原魯先生者蘇之崑山人也先生元末天下兵起學士大夫爭竄山澤亡棄故時業先生獨抱墳籍隱居海上誦讀不輟學者稱為原魯先生弘治中先生所居鄉分隸太倉祀太倉州學迨先生四世孫封給諫海隱公徙長洲復立專祠於郡城故復迎先生主爰新祠扁曰濂洛遺儒云太史氏曰余嘗觀古今人物雖公卿侍從以功業著者亦相望於世而儒之醇者則曠世不數見豈非儒之難其人哉孔孟之後數千年而得周子河洛二程復羽翼之斯道始明說者謂有以接孟氏之傳迄今復數百年接濂洛之傳者考亭朱子之外不多見道在人心不容終亡元末乃得原魯先生余竊有感焉方高皇帝之初一新文命招選儒碩共定朝章先生嘗一至京師訪所延儒生復遜跡海濱不應有司貢舉嘗聞之故老先生讀書必正冠服終日端坐更寒暑無惰容所憑几兩肱迹入木寸許其觀經史多所箋釋不泥成說今所著述不可復見蓋散逸多矣嘉靖初年詔錄所

在野史有司從故老言乃舉祀州學後郡守金公城復斥吳縣卧佛寺東隙地建專祀蓋以風勵來學且使先生子孫家吳城者得便瞻謁云給諫君考論世德每恨於文籍之無徵然先生去今餘二百年故老稱篤學好



禮者猶必曰原魯先生則先生之所養可想也余嘗病漢初去古未遠先王之教猶未息漢之儒者乃僅得張良叔孫通其人豈秦人坑焚之後世果無真儒亦有之而深藏不出焉言論風旨不概聞於後也乃今以原魯先生推之世固有默會道真不求人知者矣先生殆其一也謂朱子之後濂洛之學不傳是斯道有滅息之時而重誣吾人也可乎哉今給諫君復講學不怠顧多君子斯道重有賴矣先生諱愚封給諫海隱公諱啓明海隱公淳厚博雅亦祀郡學今耐先生祠給諫君名存仁堂成於某年月日行吳縣給帖蠲差者督糧叅政餘姚翁公大立云

表忠祠在府治雍熙寺西祀明遜國忠臣姚善黃子澄二尚書祠在府胥門外胥橋祀明夏元吉周忱明弘治中建今圯又有周文襄祠在寶林寺內

况公祠在府學祀明郡守况鍾正統間建

陳僖敏祠在府城鐵甌巷祀明左都御史陳鎰成化中

建

國朝康熙間改建巷北

韓襄毅祠在府學東祀明韓雍嘉靖間建

王文恪祠在府治舊景德寺祀明大學士王鏊

周忠介祠在府治衛西祀明周順昌崇正時建

徐公祠在府治祀明徐汧

國朝潘耒重建徐宮詹公祠碑

人之自致不朽者惟此忠孝大節孤行於天地間而善俗

維風亦常以勸忠教孝為先務故勝國之忠節往往表彰於興朝若周世宗之旌劉仁贍宋藝祖之褒韓通明太祖之表余闕並為贈官立祠而齊高祖勅史臣為袁粲立傳元修宋史亦具載文陸諸人蓋忠於所事而殉之以死者人臣之極則褒忠錄節以扶植綱常者古今之通義身沒而名存事久而論定正氣憑焉不可得而磨滅也前明末造朝臣死忠者班班可考而吾吳則宮詹勿齋為最著公自為經生時即以希聖希賢自淬厲



入詞苑為講官正色立朝風節與文文肅姚文毅相上下北都之變公方家居不即死比聞金陵不守指池水謂人曰江萬里吾師也卒自沉以死天下稱純臣焉公歿四十餘年而潛庵湯公來撫吾吳為公建專祠於虎邱載在祀典有司春秋致祭崇德報功甚盛典也已而徐氏有敗類之孽竄入其中姦民從而誘之遂至毀像撤屋盡售諸人於是徐之宗老暨郡人士控於中丞于公下長邑覆勘乃正厥罰主持其事者郡紳咸集而侍講訪濂彭公之力為多第毀祠之罪雖懲而復祠之資未辦會彭公有編纂之事於維揚言於銀臺曹公首捐厚資兼諭所屬伙助得祠費大半於是郡士大夫協力裨補不日落成以虎邱故址頽陷改築於長洲學宮之東偏祠屋三楹中奉宮詹公旁以許顧兩文學配許先生玉重聞燕京之變行哭三日自縊福清觀不死投胥江不死絕粒七日死顧先生以布衣諸生而慷慨殉國人宮不死復赴水死兩先生以布衣諸生而慷慨殉國人尤賢之用配宮詹公忠臣烈士叅列一堂宮詹公有子昭法先生亦以清操介節見重於世稱真孝廉中丞于公別致褒獎祀諸鄉賢殿禮並稱聞者興起夫庠序之設所以明人倫也至性人人本具聖賢人人可為處變處常各有當盡之道母曰俎豆學宮非吾儕事其可也末少受業於孝廉先生備聞世德幸祀典之再光公論

之不泯也謹叙  
述其始末云

三高祠在府治華山下祀明趙宦光王在公朱鷺

景賢祠在府治堯峯資慶寺祀明吳寬附明申時行記

吳郡城西二十里許峯巒鬱林壑幽奇瓌麗之觀不可勝數吳山最勝從吳山折而南衡岡疊巘蜿蜒翠嶺者不可勝數堯峯最勝堯峯有寺曰資慶蓋宋建云或曰在晉為免水院故堯時民避水處云寺據山巔俯瞰笠澤縹緲莫釐諸峯在襟帶間懸崖仄徑清泉秀石蓋堯峯之勝盡在於是然歲久荒落去城闔絕遠冠蓋屐履之遊不至即至不數數也余友周公暇民遊憇山中酌寶雲泉而甘之將作亭其上未果久之觀一像廡間黯黯不辨類非神佛者怪之以問寺僧僧曰嘻此故宗伯吳文定公像也往公讀書結社於此登朝乃去寺且圯矣賴公垣之而新故肖貌為祠以報而祠竟燬獨遺像存焉然莫能復也公瑕則慨然曰吁有是哉曩吾師衡山先生嘗及公門其言論風台相似推本言之公吾師之師也且夫復廢字還舊觀以景先哲報德舉意庶其在也此吾力能成之乃出資買材涓辰庀役既成則奉文定公像居其中以衡山先生配而買田若干畝畀寺僧掌



之曰令世世香火之奉與茲山俱永毋絕也公瑕遊京師語余請顏其祠余命之曰景賢且記其事語曰高山仰止景行行止雖不能至然心嚮往之曩文定公薨庵先生以耆宿任公卿至貴重然恭謹無與比與人言未嘗不推轂當世之賢士衡山先生聲滿天下兒童婦女莫不知名而退焉若無能者其獎後進游揚薦達惟恐不及蓋先輩之典型如是當是時吳俗斌斌乎可觀矣自二先生往而吳俗凡幾變垂紳側弁之士斷斷如也繇斯以觀二先生之系世道豈淺鮮哉然二先生者不獨薦紳家稱之而遺民故老能傳其事不獨俎豆學宮之上而深山窮谷能妥其靈不獨邦居大夫尚知禮於其廬而及門私淑之士至於尸而祝之低回瞻戀而不能去則以見二先生之賢而景仰之在人心無窮已也為世道之幸與此殆公瑕建祠之意不獨報其私已也書以俟之

翰林王公祠在長洲縣祀宋長洲令王禹偁天禧間建和靖先生祠在元和縣虎邱西庵祀宋尹焞焞嘗讀書於此有三畏齋明嘉靖間重建

忠烈祠在元和縣乘鯉坊祀宋文天祥明嘉靖中建

明王鏊序忠義之在天下未嘗亡而宋世以身殉國能信大義於天下者視前代為獨盛而文丞相

之死尤偉且顯其許國之忠屢躓而奮百挫不回至於今愚夫稚子皆知其為烈也夫死一也有重於太山有輕於鴻毛則所處者異耳是故非死之難處死為難若公可謂善處死也自古以死殉國者皆居其官死其職事也方元兵渡江詔徵天下勤王無一人至者公於時出知遠州非有天下之責乃獨慨然獎率三軍毀其家以殉國其氣固已凜然蓋天下矣及挺身出使被執而逸流離江關山樓海窺卒達行在當是時宋蓋亡矣猶號召義旅克復州縣軍敗身執志在必死祈死不死卒致之燕雖元之君臣亦皆嗟歎其賢必欲生之不得卒得死柴市從容南向有若平時蓋成仁取義公志素定於中非若倉卒履變慷慨殺身之為此公之死所以獨異而其節尤偉且顯者讀其傳誦其詩悲其志想見其人嗚呼雖與日月爭光可也公之起則知平江常州受圍公遣兵援之會詔趣入衛公去而平江旋送款矣使公不去平江必能與常犄角常猶戰不屈公其有不能乎二州戮力勢或可支即不能支亦當背城死戰元兵不敢長驅臨安得徐為之備不至倉卒旁皇一旦猝而



為辱也其後公過吳門感念悽悽遺民間公至無不垂涕者於此見公之惓惓於吳吳人之不能忘公也公既死燕京廬陵皆祠而吳獨缺太僕少卿文君森其先自廬陵徙衡山自衡來吳蓋公之裔胄也子斗願以其地作廟世守其祀巡按御史謝君琛以聞詔可賜其廟曰忠烈有司春秋享祀如禮正德十年夏廟成請予紀其事於石以詔來裔焉銘曰嘻吳故墟有魏新宮宮祀為誰丞相信公崎嶇嶺海百死無二卒死於燕卓哉正氣公身可殺公志莫折於萬斯年其志烈烈撐拄乾坤昭揭日月惟忠惟義率土嚮之况茲吳門公所素治公治於吳不能百日公惠在吳終古不沒公嗣公遺後復吳居作廟揭虔帝命曰俞綱常民彝弗渝弗墜享祀千秋為世臣礪

國朝鄭敷教有記

大宋養士三百年國亡死事之臣甚烈文丞相信國公實首稱焉百世而下祀公於

所生之鄉所死之地所經歷之境幾徧方域矣其勅建於吳中也自正德六年辛未始也公昔勤王之師常開閩平江既係燕獄有集社詩二百首如自作年譜其叙蘇州云予領兵赴闕時陳宜中歸永嘉留丞相夢炎當國夢炎意不相樂出予以制閩守平江尋以獨松事急趣還宿衛予行未幾姑蘇陷哀哉公蓋一日不能忘姑蘇

蘇而蘇州之人心百世不能忘公有以也其奉勅改建於學宮自嘉靖二十年辛丑長洲縣學既遷之後也公後人待詔公徵明書正氣歌於堂之壁生氣凜然惟公之學一歸於孔孟殺身成仁舍生取義以公衣帶中所藏立公位於孔氏之庭豈曰時會使然蓋亦至聖大賢精英有以相盪也自辛丑至萬曆乙卯歷七十餘年而祠宇日圯邑宰胡公士容謀於公後人孝廉震孟重修之後孝廉亦以狀元位至相國風節義概能繩其武云自乙卯至今庚戌又五十餘年而傾圮者鞠為草莽矣其裔孫世光謀助於一時好義之人則顧考功予咸實首倡之濱死以屬其後人而堂宇重新焉蓋予讀宋史至信國公事及井中心史所載文丞相序未嘗不骨顛魂搖有甚於謝翱之慟哭也公嘗謂大宋三百年宗廟社稷為賈似道一人所破壞於乎何后世似道接迹而如信國公者虛無人信國公之靈其必有恫乎不寧倍於昔日者乎祠之始建再建聞於朝重修也輪於官今煢煢興起於不振之子孫與夫好義之人心是可悲也已雖然今日而猶可興起也即人心為足恃而我公日星河嶽之精英為不磨也夫

陳五經祠在元和縣圓橋巷祀明檢討陳繼



國朝潘耒有記前明仁宗時吾郡陳先生繼宋文忠公堯叟

於濟南官舍先生生甫十月母吳夫人抱之還吳家徒

壁立躬自紡績撫且教之既長乃從名師碩儒游冲然

即有所得凡於義理之歸皆體察而究明之家日益貧

學日益富與其德配金孺人墾鋤廢地以致其孝養躬

耕樂道若將終身維時仁宗欲求鴻儒講論治道少傅

楊公士奇舉先生於朝授翰林院五經博士宣宗嗣位

命修兩朝實錄攷覈為當立朝多所講明輔臣喜得資

助晉官檢討將大用之以年老疾作上疏乞歸前後從

先生游者凡數百人皆經明行修闡揚師說可以信今

而傳後先生之德為不孤而學之所被者廣豈非中流

之一柱而為吾儒所宗主者乎先是先生神位於前明

時奉於郡庠鄉賢祠中未有專祠以馨俎豆康熙二十

九年先生之世孫璫及圭等請於中丞洪公建祠於長

邑之懸橋里載之祀典俾璫輩奉其禮祀以垂不朽於

是文孫書梓其家乘索詞於耒以饒諸石此不第陳氏

子孫登斯堂而思祖德以持其身鄉之人士其有不觀

感而興起者哉是為記

申文定祠在元和縣流化坊祀明大學士申時行

韓宗伯祠在元和縣祀明韓世能

三賢祠在元和縣虎邱山祀明文震孟姚希孟陳仁錫

又有陳文莊祠在虎邱山寺西專祀陳仁錫

國朝汪琬陳文莊公祠堂記前明南京國子祭酒贈詹事陳

閱十年其長君濟生獻公所著書於朝始予贈諡追錄

其子一人建專祠以祀於是借其弟濟植卜地建祠於

府治卧龍街歲月且久有司時節往祀輒歎其密邇市

寰湫隘不足以稱也乃謀遷於虎邱得民居若干楹間

而更新之門廡壯麗堂寢崇宏其旁則餽食有所庖湍

有廬又其旁則有廩有倉凡文莊公所置贍族義田若

干頃及祭田若干畝其所得歲租悉出納於此蓋其地

山川之雄秀林陸之亢爽烟雲竹木之靄深實稱神明

所棲非故祠比工已告成次君濟植復聚族謀曰維茲

麗牲之碑闕焉無辭以刻非所以妥先靈而示子姓也

乃來謁某為文某自惟鄉曲晚進未及登公之堂而受

其學顧少而嘗從兩公子游倘獲挂名碑尾附公以不

朽固素願也遂不敢禮辭謹按劉念臺黃石齋兩先生

所撰文莊公家傳每言公之在熹宗末也以講官負重

江南通志 卷三十一 輿地志 壇廟 蘇州府



望會逆奄魏忠賢父子冒功求給鐵券公當草請詞忠賢  
賢屢遣使趨公公奮曰首可斷誥不可草由是觸忠賢  
怒與妖人孫文豸獄牽連及公竟削籍以歸數陽言殺  
公懂而得免嗟乎間觀史所載宦官之禍無世蔑有殆  
未有如漢唐及前明之甚者也然而漢之亡也以十常  
侍唐之亡也以北司是直宦官與士大夫為難耳前明  
則不然君子小人雜然並立於朝日夜分門戶求傾軋  
而小人遂借刃於宦官以戕君子此其過在士大夫非  
專屬諸宦官也當是之時吾郡被禍最酷不幸而死則  
有周忠介忠毅兩公幸而生則有公與文文肅姚文毅  
三公夫兩周公之死非輕生也公與文姚之生非避死  
也皆天也天之死兩周公所以伸忠臣之節也其生公  
與文姚諸賢者所以養直臣之氣也假令諸賢悉畢命  
於銀鑕桁楊之下則國無人焉吾見夫覩顏蒙面絕無  
顧恤嘯九千歲之不已必至於九錫策九錫之不已必  
至於勸進亦何所畏忌而弗敢為耶此公與諸賢之幸  
存係於前明宗社非小也某故曰天也由今思之向之  
號為義子義孫者其威福勢談非不盛且熾也曾幾何  
時而俱歸於漸盡泯滅雖下訖於婦人豎子亦往往戢  
手恣口指斥其姓氏以為詬厲而公與諸賢獨名在天  
壤能使言之者太息聞之者興起然則君子小人其獲  
報於天者又孰為愈哉今且距公之沒踰五十年矣四

方士庶往來虎邱者登其祠而拜瞻其祀主有不歛歔  
俯仰想見公之風聲氣烈徘徊不去者乎吾知其必無  
是也祠成於康熙十九年又三年某始為之文至若公  
之述作已行於時其家世生卒之詳已見於劉黃兩先  
生所撰者槩不復詮次云公諱仁錫字明卿天啟壬戌  
科進士第三人由編修歷官南祭酒別自號芝臺學者  
稱芝臺先生

忠孝龔先生祠在元和縣中臺基祀明龔元祥

張公祠在元和縣虎邱白公隄祀明張國維

二姜先生祠祠臨虎邱山古鶴澗祀明姜埰姜垓

女金剛祠在支硎山祀明烈婦張士伯妻陳氏崇正時

建

宋文恪祠在元和縣虎邱山祀

國朝大學士宋德宜



顧孝子祠在元和縣虎邱山塘祀

國朝顧天朗

聖祖御書賜孝靖二字額

甘泉祠在吳江縣治南六里祀龍神

三高祠在吳江縣釣雪灘祀越范蠡晉張翰唐陸龜蒙

附宋范成大記 乾道三年二月吳江縣新作三高祠成

皮晉大司馬東曹掾姓張氏是為江東步兵唐贈右相  
又嘗一用人之國功大名顯而去之季鷹魯望脩然躍  
儒使有為於當時其所成就不可逾度要皆以得道見  
微脫屣天行清風峻節相望於松江太湖之上故天下  
同高之而邑人獨私得奉烝嘗以誇於四方邑大夫趙  
伯虛以故祠為陋將改作鄉老王份獻地雪灘乃築堂  
其上告遷而奠焉且屬石湖范成大為之辭噫不有君  
子其能國乎今乃自放寂寞之濱掉頭而不顧人又從  
而以為高此豈盛際之所願哉後之人高三君之風而

跡其所以去為世道計者可以懼矣至於豪傑之士或  
肆志乎軒冕宴安留連卒悔於後者亦將有感於斯堂  
而成大何足以述之然屈平既從彭咸而叢桂之賦猶  
招隱士凝若幽處林薄不死而仙况如三君蟬脫溷濁  
得全於天者嘗試倚楹而望水光浮空雲日下上風帆  
烟篷飄忽晦明意必往來其間成大亦何足以見之姑  
効小山作歌三章以招之焉遂從而歌之歌曰若有人  
兮扁舟撫湖海兮遠遊眾芳媚兮高邱忽獨君兮不可  
留長風積兮波浪白蕩搖空明兮南北一色鏡萬里兮  
滄浦戰爭蝸角兮昨夢一笑水雲得意兮垂虹可以艤  
棹仙之人兮壽無涯樂哉垂虹兮去復來載歌曰若有  
人兮橫大江秋風起兮歸故鄉鴻冥飛兮白鷗舞吳波  
鱗鱗兮而在下嗟人奚為兮天地四方美無度兮吾之  
上瞻修鱸兮雪霏登菰菹兮莖之山水續兮胥命君可  
望兮不可追顛倒景兮揮碧寥娛宴息兮江之臯萊蘋  
堂兮蘼杜若一杯之酒兮我為君酌又歌曰若有人兮  
北江之渚披雲而晞兮頽烟雨菊莎兮杞棘歲晚晚兮  
何以續君食餽五鼎兮腥腐羞三泉兮終古千秋風露  
兮歸來故墟月明無人兮蒼石與語牛宮如今生蒲荷  
潮東西兮下田一波訪南涇兮鄰曲山川良是  
兮邱隴多稼九畹兮今其刈聊春容兮茲里



諸葛武侯祠在吳江縣薛步村

顧公祠在吳江縣北門外三里橋側祀晉顧野王

三忠祠在吳江縣長橋祀吳伍員唐張巡宋岳飛

吳孝子祠在吳江縣祀明孝子吳璋

沈太常祠在吳江縣後祀明沈漢

周相國祠在吳江縣治東祀明周道登

周忠毅祠在吳江縣永定橋祀明御史周宗建

周恭肅祠在震澤縣上塘祀明周用

清權祠在常熟縣虞山北麓祀虞仲

吳公祠在常熟縣學大殿後祀子游 又文學書院在

縣東康熙四十四年

御賜文開吳會四字扁額

附宋朱熹記

平江府常熟縣學丹陽

言偃子游之祠也按太史公記孔門諸子多東州之士  
 獨公為吳人而此縣有巷名子游橋名文學相傳至今  
 圖經又言公之故宅在縣西北而舊井存焉今則雖不  
 復可見而公為此縣之人蓋不誣矣然自孔子之沒以  
 至於今千有六百餘年郡縣之學通祀先聖公雖以列  
 得從餽食而其鄉邑乃未有能表其事而出之者慶元  
 三年七月知縣事通直郎會稽孫應時乃始即其學宮  
 講堂之東偏作為此堂以奉祠事是歲中冬長至之日  
 躬率邑人學士大夫及其子弟奠爵釋菜以妥其靈而  
 以書來曰願有記也熹惟歷代之前帝王之興率在  
 土以故德行道藝之教其行於近者著而人之觀感服  
 習以入德者深若人勾吳之墟則在虞夏五服是為要  
 荒之外爰自泰伯采藥荆蠻始得其民端委以臨之然  
 亦淑慎其身而虞虢之後相傳累世乃能有以自通於  
 上國其俗蓋亦樸鄙而不文矣公生其間乃能獨悅周  
 公仲尼之道而北學於中國身通受業遂因文學以得  
 聖人之一體豈不可為豪傑之士哉今以論語考其語  
 言類皆簡易踈通高暢宏達其曰本之則無者雖若見  
 誦於子夏與要為知有本也則其所謂文學固宜有以  
 異乎今世之文學既又考其行事則武城之政不小其



邑而必以詩書禮樂為先務其視有勇足民之効蓋有不足為者至使聖師為之莞爾而笑則其與之之意豈淺淺哉及其取人則又以二事之細而得滅明之賢亦其義氣之感默有以相契者以故近世論者意其為人必當敏於聞道而不滯於形器豈為南方之學得其精華者乃自古而已然也耶矧今全吳通為畿輔文物之盛絕異曩時孫君於此又能舉千載之闕遺稽古崇德以勵其學者則武城絃歌之意於是乎在故熹喜聞其事而樂為之書至於孔門設科之法與公之言所謂本所謂道及其所以取人者願諸生相與勉焉以進其實使此邑之人百世之下復有如公者出而又有以一灑夫媮懦憚事無廉耻而嗜飲食之譏焉是則孫君之志而亦熹之願也公之追爵自唐開元始封吳侯我朝政和禮書已號丹陽公而紹興御贊猶有唐封至淳熙間所頒位次又改稱吳公云

張長史祠在常熟縣學門內祀唐張旭旭嘗為縣尉海神李王祠在常熟縣致道觀

黃公祠在常熟縣西祀明遜國忠臣黃鉞

程公祠在常熟縣慧日寺祀明死土木之難刑部員外郎程式

蔣忠烈祠在常熟縣致道觀祀明御史蔣欽

楊忠愍祠在常熟縣塘泔祀明縣令楊漣

瞿文懿祠在常熟縣虞山拂水巖西祀明尚書瞿景淳

唐公祠在常熟縣慧日寺西祀明殉流賊難葉縣令唐

天恩

于公祠在常熟縣慧日寺西祀

國朝知縣于宗堯

吳文恪祠在昭文縣治東祀明吳訥

陸氏三賢祠在崑山縣東陳墓鎮祀漢陸伯元唐陸贄



陸龜蒙

劉龍洲祠在崑山縣馬鞍山東祀宋詩人廬陵劉過

葉文莊祠在崑山縣學後祀明葉盛

魏恭簡祠在崑山縣學東祀明太常卿魏校

忠烈祠在崑山縣祀明禦倭戰死生員陳淮

張烈愍祠在崑山縣麗澤門外祀明死川賊難興文令

張振德

衛文節祠在新陽縣馬鞍山華藏寺左祀宋太師衛涇

朱恭靖祠在新陽縣馬鞍山祀明尚書朱希周

顧文康祠在新陽縣馬鞍山之陽祀明大學士顧鼎臣

文星閣在長洲學東南明萬曆中建

國朝殿元彭定求修

事賢堂在崑山縣報國寺東祀唐王綱宋潘友文張方

平程沂韓正彥巫自修元知州王安真潘昂霄

四賢堂在崑山縣東祀宋給事中莫濟學士周必大侍

御史王希呂李衡

湯公祠在府學內西偏祀巡撫湯斌

于公祠與湯公祠並祀總督諡清端于成龍

御書賜高行清粹四字又對一聯曰歷任甘棠隨地蔭兩江清

節至今傳

附

彭定求重建于清端公祠碑

康熙四十有五年吳中士

民合請於蘇州府申藩臬二司以達督撫學三院曰維

前兩江總制于清端公之秉憲也以廉為我

朝督撫大臣之冠勵一介不取之節守四知自省之義飭吏治恤民情苞苴既除疾苦畢達軍戢於伍士養於庠農



活於野一時遐邇嚮風頌聲大作咸曰包孝肅趙清獻  
再出也我蘇雖去金陵遠而翹首跂足如日在森然轅  
戟之下嘗遇公巡歷海疆襍被輕攜蓬舟徑渡郵傳間  
絕不覺有按部之役士民伏謁道旁條列地方事宜輒  
為溫言采訪得其實者即與施行公謂吳俗澆而鮮樸  
親製忍字歌頒行勸諭大旨以息爭止訟為全生保家  
之道言言剴摯而周詳可以家諭戶曉不啻若遵鐸之  
狗於路焉故公薨之後民間悲慕謳吟境內相望吾蘇  
既立祠於城中通闈坊久矣第以逼近梵宇規模隘狹  
其於報德告虔之制弗稱應易地而更新之謹按前巡  
撫睢州湯公得民心為最甚而祠在蘇州府學春秋侑  
享典禮綦隆若公之清德實先湯公而著聞於時莫若  
兩祠並建則儀型昭揭相得益彰可以範世濯俗俾我  
民愛其休庇者實深且遠牒既上三院下其議於所司  
得允士民之請眾遂踴躍趨事度地於湯公祠之右棟  
梁輒斃資助駢集前後堂廡凡若干楹周以繚垣兩祠  
合為一門以入高明爽塏儼乎神明所棲越十二月既  
望厥工告成涓吉升主以祭士民胥大和會笙歌奏牲  
醴陳咸曰是舉也以崇邦憲至順也以樹官箴至明也  
以愜民望至公也乃屬定求叙建祠之始末而為文以  
識定求曾紀公祠之在金陵者有二若我郡尸祝之忱  
如是何能不又為之述乃對眾而申質之曰學宮從祀

之典由來重矣凡吏有賢績於地方則稱名宦而合為  
之祠其尤粹者間有專祠以別於龐雜他附之所郡學  
中惟唐之韋刺史宋之范文正胡安定三祠鼎峙已爾  
歷數百年始得一湯公為之繼茲復媿之以公而眾議  
無不翕從者蓋深信公之廉出之以至誠而不等於立  
名之矯行之以至正而不流於制行之偏自其起家儒  
素歷民社縮封疆從未嘗一日攜家人入署公爾忘私  
皎然獨拔於流俗令行於光天化日之中而恩及於窮  
簷蔀屋之際清著於茹蘖飲冰之節而愛篤於輟春弛  
瑟之餘謂非素所謹身慎獨存理遏欲者孰能與於此  
古之大臣必有干駟弗受萬鍾不易之操而後能以匹  
夫匹婦莫不得所為己任此聖門之學莫先於義利之  
辨也  
伏觀

今上獎廉異數至於公而褒揚軫恤

宸章光耀茂以加矣曩者

上特諭日理學無取空言若于某不言理學而服官至廉斯即

聖訓聞者莫不動容悚息則今日祀公於學宮正所以對揚

天子之明命而匡維世道於不墜固非泛泛紀循良托遺愛者  
所可援比以論也惟湯公以理學而顯於廉惟公以廉

江蘇通志 卷三十八 輿地志 壇廟 蘇州府



而合於理學名實同揆幽明允協可與先聖先賢臨之  
在上質之在旁者有弗信矣乎僉謂是言也可以使後  
人知所考焉因勒諸石而凡士民  
之捐助者皆以姓名列於碑陰云

商相巫咸墓在常熟縣虞山子賢亦葬此宋王燾為縣令  
嘗修其墓

仲雍墓在常熟縣虞山

周吳王夫差墓在長洲縣陽山

先賢澹臺滅明墓在長洲縣澹臺湖旁

慶忌墓在長洲縣齊門外今云慶墳

吳王闔廬墓在元和縣虎邱山劍池

申公巫臣墓在元和縣匠門外一云在巫門外

吳將孫武墓在巫門外

干將墓在匠門外匠門本名干將門因干將葬此故名

後訛為匠干將與其妻莫耶俱善鑄劍

吳王僚墓在吳縣峯嶸山

吳女墓在吳縣閶門外吳王闔廬女也

專諸墓相傳在吳縣盤門內伍員廟側

要離墓在吳縣閶門南傍城

吳子周章墓在常熟縣虞山

齊女墓在虞山吳太子所娶齊女也

先賢言偃墓在虞山

漢三老顧綜墓在元和縣婁門外

尚書朱穆墓在元和縣婁門東南二里與顧綜墓相直



蜀郡太守張康墓俗名鳳凰墩在吳縣界按張康不見載籍唐宰相表載蜀郡太守張睦康或即睦也

高士梁鴻墓在吳縣要離墓西

議郎臯伯通墓在吳縣胥門外號伯通塾

都尉陸烈墓烈初為吳令後為豫章都尉吳人思之迎

葬於胥亭或云墓在長洲縣秦餘杭山

孝子黃香墓在昭文縣梅里鎮宋乾道初人於此得古

碑昇歸家有光怪棄之昆承湖中

會稽太守嚴助墓在震澤縣東南百里今名嚴墓村

三國吳孫王墓在元和縣盤門外孫王謂吳大帝父堅母

吳夫人及兄策也晉元康中吳令謝詢表求置守塚者

五人修護掃除詔從之

謝詢表

臣聞成湯革夏而封

春秋征伐則晉修虞祀燕祭齊廟夫一國為一人與先賢為後愚廢誠仁聖所哀悼而不忍也故三代敦繼絕之德春秋貴柔服之義昔漢高受命追存六國凡諸絕邦一時並祀親與項羽對爭存亡逮羽之死乃以公葬若使羽位承前緒世有哲王一朝力屈全身從命則楚廟不墮有後可冀伏惟大晉應天順民武成止戈西戎有即序之人京邑開吳蜀之館興滅加乎萬國繼絕接於百世雖三五弘道商周稱仁洋洋之美未足以喻是以孫氏雖家失吳祚而族蒙晉榮子孫量才比肩取進懷金侯服佩青千里當時受恩多有過臣聞春兩潤木自葉流根鴟鴞卹功愛子及室故天稱罔極之恩聖有網繆之惠追惟吳僞武烈皇帝遭漢室之弱值亂臣之強首倡義兵先眾犯難破董卓於陽人濟神器於甄井威振羣牧名顯徃朝桓王才武弱冠承業招百越之士奮鷹揚之勢西赴許州將迎幼主雖元勳未終然至忠已著夫家積義勇之基世傳扶危之業進為狗漢之臣退為開吳之主而蒸嘗絕於三葉園陵殘於薪采臣竊痛之伏見平吳之初明詔追錄先賢欲封其墓愚謂二君並宜應書故舉勞則力輸先代論德則惠存江南正刑則罪非晉寇從坐則異代已輕若列先賢之數蒙



詔書之恩裁加表異以寵亡靈則人望克厭誰曰不宜  
二君私人多在墓側今為平民乞差五人獨徭役使四  
時修護頽毀掃除 **明盧熊孫王墓** 古漢豫州刺史孫  
瑩壟承以為常 堅妻吳夫人及其

子會稽太守策三墓並在盤門外三里即今齊昇院東  
南面勢據古蛇門正與府治相向祥符圖經云孫堅墩

方俗稱為孫王墓按吳書堅死於初平二年合葬  
策死於建安五年年二十六吳氏死於建安七年合葬

堅墓黃龍元年權追尊堅為武烈皇帝廟曰始祖墓曰  
高陵吳氏為武烈皇后策為長沙桓王太元元年八月

朔風拔高陵松柏石碑動晉陽秋云惠帝元康中吳令  
河東謝詢表為孫氏二君置守塚五人修護掃除有詔

從之其文張俊所作今載文選陸廣微亦云盤門東北  
二里有吳武烈皇帝并長沙桓王等三墓前志云宋政

和六年村民發墓其輓側皆有萬歲永藏四篆字得金  
玉奇器甚多有東西銀杯初若梨花良久化為腐土并

金搔頭十數枚金握背二悉皆如新一瓦薰罏如近世  
陸墓所制畧似而箱底灰炭猶存碑石斷缺僅餘中平

年三字州將遽命掩之所得古物盡歸朱勔家洪伯芻  
香譜亦畧載此事即楊友夔所賦孫豫州墓者是也洪

氏三庚志云盤門外大家紹興二年秋雨隕圮牧童入  
其間得銅器數種持賣於市鄉人往視圮處蓋其隧道口

有石刻隸書云大吳長沙桓王之墓赤烏三年凡十二  
字知府沈揆亟命掩塞仍立石表其所勝處為記袁席

之云策死距赤烏三年已四十載豈非權稱制之久復  
改葬乎所得之器勝藏一小鏡其背有銘十四字一銅

小麟鎮紙無款識以遺席之嘉熙中墓傍土中又得唐  
孫德琳墓志云開元十年窆於十四代祖吳武烈皇帝

陵東南平地又按丹陽圖經載高陵在縣西練塘鄉吳  
陵港熊以傳記證之當是堅葬曲阿後遷於吳史不及

詳載爾勝歲所記謂紹康中提舉常平詹體仁嘗命其  
屬表之題曰先賢墓徐誼屬歲考訂止從俗稱孫王墓

歲蓋據陳壽說破敵葬曲阿及言策之薨其將周瑜魯  
肅皆赴喪獨指此為伯符之墓亦未嘗及謝詢所表不

審三墳同域故論說紛紜自相牴牾在政和知為豫州  
之墓在紹興知為長沙之墓皆不能質諸傳記以求其

說地亦嘗為宮窰故舊志不復詳究矣因備  
載始末傳諸好事仍錄古今文詞如左云

鬱林太守陸績墓在吳縣陽抱山

將軍朱桓墓在吳縣橫山

丞相步騭墓吳縣東北三里

蘇州府



江南通志 卷三十八  
墓  
〔晉〕廬江太守闕臻墓在長洲縣齊門東北二里今名闕村

驃騎將軍顧榮墓在元和縣黃天蕩南

司空何充墓在吳縣峯嶸山東一里

東曹掾張翰墓在吳縣橫山東五里

〔南北朝〕宋青州刺史郁泰元墓或謂今元墓山卽其地泰元性仁恕葬日燕數千啣土今塚猶高大異他墳村鄉歲時祭祀見蘇州塚墓記

〔齊〕太常陸倕墓在吳縣綬山鄉墓石從子襄爲序湘東王繹爲銘普通六年立

雅兒墓在吳縣至德鄉湘東太守張濟女也今訛雅宜

山

〔梁〕公主墓在長洲縣乘鯉坊卽法尼寺後大土邱相傳梁武帝女出降郡人孫瑒寺卽瑒故宅

黃門郎陸雲公墓在吳縣橫山俗稱陸墓山舊圖經訛爲陸雲墓非

〔陳〕黃門侍郎顧野王墓在吳縣楞柳山下

于將軍墓在吳縣東洞庭山俞塢

莫釐將軍墓在吳縣東洞庭山靈祐廟前

〔唐〕平章事陸贄墓在長洲縣齊門外六里官河之西地名陸墓相傳陸宣公墓此故名宋淳熙間有於墓傍得遺刻與所傳合或謂贄生於嘉興寶華寺乃其故宅自貶



忠州別駕卒卽藁葬其地今忠州至虛觀三十步是其  
葬處又謂贄已歸葬而忠州特虛設耳

法曹參軍張從師墓在元和縣虎邱山西原

天隨子陸龜蒙墓在元和縣甫里旁有白蓮寺

真娘墓在元和縣虎邱山西臨水唐李紳詩序云真娘

吳之妓人歌舞有名死葬虎邱寺前墓多花草

幽獨君墓在虎邱山北大曆十二年虎邱寺有鬼題詩

隱於壁間云幽明雖異路平昔忝工文欲知潛寂處山

北有孤墳莫詳姓氏故稱爲幽獨君

鸞臺侍郎顏崇墓在吳縣秦伯廟西

宰相陸象先墓在吳縣光福山西

節度使歸融墓在吳縣城西二十餘里

尙書姚紹之墓在吳縣西五里

宰相范履冰墓在吳縣天平山左麓仲淹遠祖

卜將軍墓在崑山縣西鹿城鄉嘗有人得斷碑其畧云

將軍姓卜名珍字文超西河人偉異有大志敬宗時紀

綱頓委藩鎮騷然將軍奮孤忠勲業爲世所重寶曆中

卒葬此

五代吳越廣陵王錢元璪墓在吳縣橫山其子中吳軍節

度使文奉墓亦在此

祕書郎姜希業墓在崑山縣姜里村鳳凰墩下明嘉靖

中村人取土得石誌云希業字可大吳中人也仕吳越



為觀察巡官以祕書省校書郎宋乾道中卒葬此

〔宋〕龍圖學士滕元發墓在長洲縣陽山栗塢蘇軾有誌銘

元發東陽人帥真定河東治邊凜然威行西北

簽書樞密王倫墓在長洲縣陽山大石塢倫字正道莘

縣人宰相旦族孫使金留六載不遣還欲以為轉運使

不受使人縊殺之子述與從兄遵間入金境得倫骨以

歸官給葬事

尚書鄭起潛墓

縣尉鄭虎臣墓俱在陽山西

安撫使魏克愚墓在陽山栗塢

駙馬石端禮并陳國長公主墓在吳縣橫山法雲寺公

主哲宗女

范氏祖墓在吳縣天平山三讓原仲淹曾祖夢齡祖贊

時父墉並葬於此俱贈官太師今稱三太師墓又范直

方純仁之孫正己純禮之子二墓俱相近

參政范仲淹墓在吳縣天平山麓

按仲淹葬於河南

尹樊里之萬安山下見歐陽修所撰神道碑此處俗稱

為衣冠墓

尚書李堪墓在吳縣至德鄉洞涇西

節度使鄭戩墓在吳縣橫山感慈塢

學士葉清臣墓在橫山寶華寺旁

待制沈起墓在吳縣長山鄉三顧原

侍郎蔣堂墓在橫山魯塢

侍郎陳質墓在吳縣華山



同知樞密滕康墓在華山 廉靖處士滕宸墓在華山

正字朱長文墓在吳縣支硎山

給事中程師孟墓在橫山下蘇舜卿銘

集賢校理林槩墓在橫山

贈特進盧文秀墓 太子賓客盧革墓

直學士盧秉墓 學士盧法原墓俱在吳縣穹窿山

學士錢藻墓在天平山

三司副使范師道墓在吳縣天平寺西趙抃志

學士范良器墓在吳縣楞伽山下

尚書范之柔墓在吳縣燕巢山

太子中舍邊珣墓在吳縣蒸山

學士徐林墓在吳縣靈巖山

制置使胡元質墓在吳縣橫山

蘄王韓世忠墓在吳縣靈巖山西麓高宗御書墓碑碑

大而方厚如其濶

節度使趙希懌墓在穹窿山

參政范成大墓在天平山上沙村

參政高定子墓在吳縣包山

簽書樞密魏了翁墓在吳縣高景山金盆塢

處士王林墓在橫山

郎中陸縮墓在常熟縣破山

防禦使周虎墓在常熟縣邵家灣



觀察使周興裔墓在常熟縣虞山積善鄉興裔字克振道州人敦頤四世孫以和州觀察使扈蹕南渡建炎三年授武功大夫鎮守沿海死節常熟之福山賜葬於此子孫悉耐焉

司戶叅軍姚嘉言墓在常熟縣河陽山

龍圖虞衡墓在常熟縣頂山白龍祠左

孝子周容墓在虞山北麓報慈里

丞相曾懷墓在虞山興福寺北

叅政王絢墓在崑山縣童橋南

侍御史王葆墓在崑山縣東南新漕里

孝子周津墓在崑山縣小虞浦楊巷村

侍御史李衡墓在崑山縣東南圓明村

陳墓在崑山縣五保湖水中當錦溪之口有墩相傳宋

高宗之妃陳氏葬此

處士劉過墓在崑山縣馬鞍山東

太師衛涇墓在崑山縣東南石浦鎮

元七姬墓在府城東北隅潘氏後園七姬者淮張左丞潘

元紹之妾段程翟徐卞羅彭其氏也明兵圍蘇州姬等

慮有不虞義不受辱皆自經死宋克誌其墓

提舉葛應雷墓在長洲縣望墅墩

叅謀楊椿墓在虎邱山西華里

叅政王都中墓在吳縣金井塢歐陽元撰神道碑按都



中福寧州人父積翁宣諭日本遇害世祖憫焉賜平江田八千畝宅一區都中年十七授平江路治中多異政歷仕四十餘年政事之名聞天下

魏國公甯王墓在吳縣橫山丹霞塢

先儒俞琰墓在吳縣盤門外尹山鄉

處士王鑑墓在吳縣靈巖鄉橫山至正二十六年有司

買山營葬陳基誌

儒士邵光祖墓 耿燿墓 姚辨墓俱在吳縣鄧尉山

光祖字弘道饒州人燿字叔昭辨字叔雅郡人皆篤學

無嗣先後死無所歸郡士徐達佐收葬

先儒陳深墓在吳縣靈巖鄉卡墩

照磨陳訓徵士陳謙墓在吳縣天平山陳基誌

待制干文傳墓在閶門西雁蕩村

編修朱德潤墓在陽抱山

萬戶徐瑛墓在常熟縣邵舍

郎中陳基墓在常熟縣鳳凰山

高士顧阿瑛墓在崑山縣

高士顧權墓在馬鞍山北麓

訓導郭翼墓在馬鞍山之陰

明起居注陳桎墓在長洲縣陽山東

尚書郁新墓在陽山西麓

贊善王璉侍講王璉墓在長洲縣陽山鳳凰峯下



尚書俞士悅墓在長洲縣白蓮橋內陳菴西  
都御史朱紘墓在長洲縣射瀆橋北

高士沈周墓在長洲縣相城西牒字圩王鏊撰誌  
尚書袁洪愈墓在葑門外

大學士王錫爵墓在來鳳橋西

員外周順昌墓在長洲縣白蓮涇馬家墩

侍郎周詔墓在長洲縣小茅山

詹事陳仁錫墓在長洲縣射瀆

少詹徐汧墓在長洲縣陽山

侍郎李蕡墓在元和縣陳公鄉

侍郎劉鉉墓在元和縣袁公巷

待詔文徵明墓在元和縣武邱鄉花涇橋

詹事姚希孟墓在婁門外下雉瀆西金涇堰北

處士顧麒墓在元和縣匠門塘楊果誌

五人墓在虎邱山塘五人者顏佩韋楊念如馬杰沈揚

周文元也

葛賢墓在虎邱山塘賢原名成

萬曆中內監孫隆私設稅務市人咸怨成倡衆

擊闔黨焚其家稅由是止繫獄十餘年遇赦得釋人呼爲葛將軍

武毅將軍蔡良瑞墓在吳縣西洞庭山卽祇園寺舊址

檢討陳繼墓在吳縣橫山茶塢

尚書楊翥墓在吳縣吳山長旗嶺下

尚書滕德懋墓在吳縣黃山



尚書金問墓在吳縣橫山

少保陳鎰墓在吳山西麓

武功伯徐有貞墓在吳縣貞山

都御史韓雍墓在吳縣雅宜山奇禾嶺

修撰施槃墓在東洞庭山

侍郎孔鏞墓在吳縣九龍山

少卿馬紹榮墓在吳縣楞柳山

尚書吳寬墓在吳縣薦福山

大學士王鏊墓在東洞庭梁家山

大學士顧鼎臣墓在吳縣潭山

都御史毛珵墓在吳縣華山 都御史陳瑄墓在華山

解元唐寅墓在吳縣橫塘王家村

侍郎徐縉墓在吳縣靈巖山

尚書徐學謨墓在吳縣彈山

尚書楊成墓在吳縣吳山

都御史盛應期墓在吳縣九龍山感慈塢

尚書劉纓墓在吳縣羊腸嶺

尚書董份墓在吳縣青芝山份烏程人其墓有遊觀之

勝

侍郎韓世能墓在吳縣岐龍山

大學士申時行墓在吳縣吳山

侍郎毛堪墓在天池山



高士趙宦光墓在吳縣寒山

徵士王穉登墓在白馬澗

通政徐如珂墓在吳縣跨塘

叅議范允臨墓在吳縣清流山

尚書申用懋墓在吳縣華巖山西

都御史蔡懋德墓在吳縣妙明山西

知州孫士美墓在吳縣士美青浦人官深州殉難

尚書吳洪墓在梅里

御史周宗建墓在吳江縣二十七都

尚書吳山墓 孝子吳璋墓俱在震澤縣梅里

尚書周用墓在震澤縣舊十八都西

給事中黃鉞墓在常熟縣報慈里

都御史吳訥墓在報慈里 知府魚侃墓在報慈里

學士李希濶墓在常熟縣宋家灣

賢良方正鄧彥章墓在北門外

尚書程宗墓在常熟縣邵家灣

員外程式墓在報慈里式死土木之難衣冠葬此

尚書李傑墓在常熟縣興福寺北

都御史章律墓在虞山朱家灣

御史蔣欽墓在常熟縣西山墓上松皆北向

知縣唐天恩墓在虞山東麓

侍郎陳瓚墓在常熟縣桃源澗



尚書瞿景淳墓在常熟縣寶巖

侍郎徐恪墓在常熟縣北門外

大學士嚴訥墓在常熟縣拂水巖下

知縣王鈇墓在拂水巖之麓鈇順天人築城禦倭死難

侍郎趙用賢墓在常熟縣羅墩

太常黃子澄墓在崑山縣馬鞍山陽子澄死後子彥修

潛充縣里正收骸骨藏焦山至洪熙元年乃葬於此邑

人侍郎劉璉為誌萬曆初裂出於土載遇難事甚詳

孝子陸安墓在崑山縣薦巖寺南烈婦鍾氏祔

處士張伯英墓在崑山縣泖川鄉蕭野之西原

尚書顧禮墓在崑山縣馬鞍山北麓

侍郎劉璉墓在馬鞍山麓 布政盛頤墓在崑山縣北

太常夏杲墓在崑山縣東南迎鐘浦

處士龔詡墓在崑山縣儒學後

府尹高敞墓在崑山縣東南門外

侍郎葉盛墓在崑山縣南湓瀆里

孝子支琮墓在崑山縣虞家巷

侍郎周廣墓在崑山縣東北蔚州村

府尹柴奇墓在崑山縣廟墩

副都李憲卿墓在崑山縣一保

侍郎顧章志墓在六保

知縣張振德墓在崑山縣西朱塘鄉



義士陳淮墓在崑山縣東南蔡巷村

侍郎虞祥墓在新陽縣南金潼里

尚書周倫墓在新陽縣新洋江東車塘里

寺丞歸有光墓在新陽縣治金潼里

國朝處士金俊明墓在長洲縣瓜山

大學士宋德宜墓在元和縣唯亭後

檢討張大受墓在元和縣婁門外

侍講尤侗墓在吳縣官山塢

都御史慕天顏墓在吳縣穹窿山天顏靜寧人卒葬此

吏部尚書吳一蜚墓在吳縣鳳凰山

刑部尚書徐乾學墓在吳縣光福鎮西

禮部尚書韓菼墓在吳縣 侍郎顧藻墓在官山塢

僉事申穉墓在吳縣長山鄉

侍講學士何焯墓在堯峯北麓

大學士金之俊墓在震澤縣

學士錢謙益墓在常熟縣虞山拂水巖下

修撰孫承恩墓在常熟縣河陽山

尚書翁叔元墓在常熟縣仁塘里

知縣于宗堯墓在虞山西麓宗堯常熟令有善政民至今思之

少詹歸允肅墓在昭文縣雙涇



江南通志卷三十八終

江南通志卷三十九

輿地志

壇廟 三 祠墓附

松常鎮三二府

松江府

社稷壇在府城北門外

風雲雷雨山川壇在集仙門外官紹塘

勅建先農壇在府治東郊壇旁置有耜田歲以仲春亥日行耕

耜禮

郡屬壇在通波門外

縣曰邑屬

里社鄉屬二壇在各鄉保

關帝廟在府城

國朝雍正五年奉



旨追封三代公爵全日祭于後殿

城隍廟在府城興聖塔院後

勅建八蜡神廟

劉猛將軍廟並在府治西南

以上壇廟所屬縣皆如制

旗纛廟在守禦千戶所廳後

輔國將軍廟在府治西南祀吳陸遜陸凱陸抗

忠義祠

節孝祠俱在府城

二祠所屬縣皆如制

制

唐宋忠良祠在府城南祀唐平章侍郎陸贄宋丞相李

綱

衛文節祠在府治蕭塘鎮祀宋參知政事衛涇明懷宗

時移建城內月河塘

胡公祠在府學西祀元教授胡存道

方正學祠在府治普照寺西偏祀明方孝孺萬曆中建

國朝康熙中知府魯超重修

聖祖御書賜額曰忠烈名臣

附

魯超重修祠記

方正學先生生於台之臨海殉

節於金陵而松故有祠則以先生之子孫在松故也先生當成祖靖難時衰麻慟哭誓死不屈以是觸成祖怒刑及九族先生幼子德宗在台年甫九歲刑部尚書魏澤時謫寧海尉受詔搜捕憐而匿之有天台秀才余學夔者佯乞食於市口嗚嗚唱歌以諷澤澤心動越二日塗遇復唱歌如前澤心知為義士乃密以德宗託之學夔挾德宗遁至松江歷青村諸鎮以織網買米得活學夔又潛入郡屬祠部郎俞允共為營護而先生門人任勉者為參政家居聞之就見德宗因妻以養女德宗由此冒姓俞氏後恐以同姓賈禍改姓余轉遷白沙鄉德宗生三子友直友諒友竹子孫繁衍世家於松至萬曆間督學侍御楊公廷筠詢訪得實檄郡建祠命其子孫



復故姓夫成祖之時忠義之士載滅無遺瓜蔓之抄禍延海內而罹禍之慘無如先生者至於種族門誅而怒猶未息後漢寇榮所謂張羅四海設且萬里雖楚購伍員漢求季布無以復過者也以事勢言之雖有朱家之柳車孫嵩之復壁豈能容舍保藏存先生一綫之祀哉然而成祖之威至亢暴也能殺先生之身而終不能奪先生九死不移之節能赤先生之族而終不能斬先生萬世血食之嗣此不可謂非天也余魏諸公不憚滅族之誅奮身協力隱匿遺孤卒全先生之祀此皆有天焉相之而其至性高義同符古人雖程嬰之全趙孤王成之保李燮其蔑以過之矣予觀有明一代忠義之士一殲於靖難再殲於魏闖而至於甲申之難忠臣義士不屈於闖賊蹈白刃赴鼎鑊而死者猶不可勝數此固先生及黃練諸人忠義之節有以倡之也然則如先生者上為日星下為河嶽足以立天柱而奠地維其繫於世道人心豈細故哉祠久毀不治予特為飾而新之祠既成予為設羊豕之奠中奉先生而旁以余魏俞任四公附焉俾方氏之子孫賢而有學行者世守其祀凡夫松郡之士及四方來遊者入先生之廟正容肅拜有典刑如在之思可以教忠焉觀余魏諸公棄家忘身保全忠裔有古人之節可以教義焉方氏之子孫世世相承蒸嘗勿替當思所以不愧祖德而勉為君子可以教孝焉所謂舉一事而三善備焉者其在此也因書之以為記俾鑾諸麗牲之石

夏周二公祠在府西南祀明周忱夏元吉成化十五年建

國朝魯超有重修祠記

國家大政莫重乎財賦而財賦出於農田農田由於水利賦額不定則取

民無制而吏得因緣為奸矣水利不修則旱澇無所資蓄洩無所備而田悉化為汙萊矣故古之名臣皆於斯盡心焉如明之夏周二公是也明永樂二年蘇松諸郡大水夏公以戶部尚書奉命發浙西兵民數十萬疏決壅滯公上言嘉定之劉家港徑通大海常熟之白茅港徑入大江宜浚吳淞江南北兩岸安亭等浦港以引太湖諸水入劉家白茅二港使之直注江海又松江大黃浦乃通吳淞要道今下流壅塞難即疏濬傍有范家浜至南踰浦口可徑達海宜濬令深闊上接大黃浦以達御河之水相度地勢各置石牯以時啟閉每歲水涸之時修築圩岸以禦暴流如此則功可成奏上得旨允行水患乃息公布衣徒步晝夜經畫盛暑却蓋弗御又念歲荒民飢奏發廩三十餘萬石賑之所全活無算民至今思之周公在宣德間以工部侍郎巡撫江南時蘇松



常三郡積欠糧以千萬計公廉知豪強有力者不出加  
耗貽累小民又糧長徵收斗斛無制取羨自由遂奏設  
管糧官定斗斛式立水次倉以秋糧正米為則定為加  
耗而以各戶應納之數置註由帖分授之俾戶自持帖  
輸納官倉里胥不得上下其手又令諸縣各立倉貯米  
以便賑貸名曰濟農復立交兌法使民免長運軍獲羨  
餘人皆稱便又松江賦額素重公奏請於朝得減稅糧  
三十餘萬又請極重官田極貧下戶並從輕折銀一兩  
折米四石布一疋折米一石計松江一郡得輕折米四  
十八萬二千六百餘石民獲蘇息公莅事勤敏時乘小  
艇駕輕輿出舍郊外與農夫野老款曲談語因得以周  
知利病在任凡十有八年至今言巡撫之有惠政者必  
首稱文襄公焉夫二公之功業在天下利澤在東南豈  
獨松之民被其德哉然松故有祠則以二公之功德所  
在尸祝而愛尤在於松也二公之去今二百餘年矣東  
南之水利日以淤塞田畝日以荒蕪而稅糧之額日以  
加重誠得如二公者出不辭勞不畏罪有饑溺由己之  
思有憂樂同民之意則陂塘港浦之淤者可通田之蕪  
者可治民之困於賦役者可以少紓而東南饑饉流亡  
之患庶幾有瘳矣此民所以思二公之德至於今日愈  
久而愈不忘也祠久蕪沒僅存遺址予為鳩工庀材復  
其舊觀既落成為文以紀之夏公名元吉字維詰諡忠

靖湖廣湘陰人周公名忱字恂如諡文襄江西吉水人  
其他行治事實具載國史不書書其有德於吳人者予  
既為之作記又緣邦人思二公之意作詩二章以頌之  
日暨暨夏公功在河渠布衣徒步周爰咨茹暑不張蓋  
勞不乘輿三江震澤實為洪瀦劉港白茅洩彼尾閭漑  
我田疇長我新畝公之不來室無峙楹公之既來飯稻  
羹魚川伯順流老幼安居千載思公拜公堂除福我吳  
民黍稷與與於赫周公來旬來宣公未莅止民呻以瘖  
賦歛無藝雀鼠蠹穿公援成畫則壤永編排闥上疏請  
折請蠲澤被八州惟松德徧息黥補劓拯溺解懸十有  
八載鴻恩覃延畢公君陳庶其比肩公歿歲久厥  
德不鐫雲車風馬精爽在天惠我人斯於萬斯年

忠烈祠在府治鍾賈山祀明深州知州孫士美與其父  
訥

董文敏祠在府治興聖寺後祀明禮部尚書董其昌康  
熙四十四年

聖祖御賜芝英雲氣四字扁額



崇正祠在周家藻里祀周思兼萬曆年建

張宮諭祠在鳳凰山祀張以誠崇正時建

陸文定祠在府西門外興福寺南祀明尚書陸樹聲

高義祠在府治南祀顧正心

徐文貞祠在府學東南祀明大學士徐階

錢太史祠在府治西門外平政橋西祀明錢福崇正時

建

三烈祠在府城右文街祀明張烈婦陳氏嚴烈婦許氏

烈女楊氏

報功祠在府治滌闕祀明知府方岳貢邑人曹家駒吳

嘉印何剛

國朝邑人吳含文宋際莊徵麟

李令祠在府治白龍潭之陽祀

國朝婁縣令李復興

沈文恪祠在府城興聖寺後祀

國朝禮部侍郎沈荃康熙年間

聖祖賜扁額曰清慎勤曰格物曰落紙烟雲曰飛霞舊德又

賜對聯一副曰兩幅彩箋揮逸翰一聲寒玉振清詞

王忠毅祠在府城普照寺西祀

國朝江南提督王之鼎康熙四十六年

聖祖御賜純忠遺愛四字扁額

周太守祠在府城北門內清風橋祀



國朝知府周錚元

四賢祠在華亭縣細林山祀晉張翰陸機陸雲梁顧野  
王

五先生祠在華亭縣干山祀陸機陸雲楊維禎錢惟善  
陸居仁

顧侍郎祠在華亭縣寶雲寺祀梁顧野王

父子忠孝祠在華亭縣學東祀明大理寺丞馮恩子應  
天府通判行可楊允繩父子

三賢祠在婁縣七星橋側舊為范文正祠明崇正時以  
范履冰范純仁合祀

國朝順治間以明兵部尚書范鏞大學士范景文附為五太

師祠

孟侍御祠在上海縣三十五保祀明孟暘

羣忠祠在上海縣祀上海縣丞劉東陽建平縣丞宋鰲

鎮海衛指揮使武尚文浙江鎮撫吳賢鳳陽散官丁爵

邑人楊鈿皆嘉靖間死倭難

黃道婆祠舊在上海縣烏泥涇屢廢屢遷今在張家浜

寧國寺西明天啟間張所望移建

附明張之象記

上海西南

廿餘里為烏泥涇故有道婆祠云道婆者姓黃氏本鎮  
人也初淪落崖州元元貞間附海舶歸閩廣多種木棉  
織紡為布名曰吉貝而道婆最善是業州里宗之先此  
烏泥涇土壤瘠瘠民多困貧因謀樹藝以給遂覓種於  
閩廣間然尚無踏車椎弓之制率用手擘去子線絃竹  
弧置案間振掉成劑厥功甚艱道婆乃教以制造捍彈  
紡織之具既以便民矣至於錯紗配色綜綫挈花又各  
有法故被褥悅帶之類織以折枝團鳳碁局文字粲然



若寫土人競相做習稍稍轉售他方以牟利業頗饒裕未幾道婆卒莫不感恩灑泣而共葬之已立祠歲時享之頃歲行遊其所已鞠為灌莽撫蹟低回者久之予遂於居舍之東北隅聽鶯橋捨地二畝集里中尚義者經始方旬煥然改飭像設具備神有棲憑焉先王之制禮也法施於民則祀之吾松之民仰機利以食實此道婆發之苟被其澤者無忘追本之思則祠祀可不廢矣

三公祠在上海縣三十保祀明都御史海瑞僉事鄭元

韶上海知縣敖選

周方二賢祠在上海縣祀明巡按周如斗知府方廉

沈布政祠在上海縣祀明沈恩

陸文裕祠在上海縣學宮後祀明詹事陸深

潘方伯祠在舊演武場上祀潘允端允端董漕儲惠及

桑梓士民德之

忠勇祠在南匯縣祀明死倭難邑人李府及二子香黍

嘉靖中建

仰德祠在南匯縣川河保祀明喬鏜喬木萬曆中建

海忠介祠在青浦縣南城濠上祀明都御史海瑞

丁清惠祠在青浦縣南祀明都御史丁賓

漢濮陽王墓在小蒸西四里

廬江太守陸康墓在府西北二十里

潁川太守陸閔墓在華亭縣西北四十里

三國吳丞相陸遜墓在府西二十三里

大司馬陸抗墓 尚書陸瑁墓 左丞相陸凱墓俱在

府城外



海鹽侯陸禕墓在崑山

宛陵侯諸葛瑾墓在奉賢縣圻石橋西雍正九年知縣舒慕芬於其地得殘碑因重為立石

〔晉〕左光祿大夫陸暉墓在府城西四十里

平原內史陸機墓在華亭縣西北二十五里又青浦縣治北三十里有高邱舊呼陸丞相墓嘉靖間土人見墓上有一金蛇盜伐其塚得古器甚多後聞於官悉捕治命封其塋地

西陽亭侯陸監墓在婁縣

左將軍袁崧墓在上海縣長人鄉崧為賊害其下李祥收骨歸葬

〔唐〕朝散郎顧謙墓在北亭鄉崧子里

〔五代〕前蜀丞相潘葛妻李氏墓在潘店北杏涇之左碑上有天漢四年葬五字

〔宋〕贈太子少保朱承進墓在佘山

將仕郎衛公佐墓在佘山

詩人儲泳墓在南匯縣周浦

樂靜先生曹澤之墓在青浦縣小蒸

〔元〕義士夏椿墓在華亭縣細林山

三高士墓在華亭縣干山東麓三高士者楊維貞陸居仁錢維善也 朱柯墓在華亭縣橫涇

貞素先生曹知白墓在華亭縣干山子永祔



蘭溪知州章夢賢墓在崧宅里 夏世澤墓在集賢鄉

秦裕伯墓在上海縣淡井廟北

孝子徐誠墓在上海縣長人鄉 衛謙墓在佘山

松江訓導王文澤墓在橫雲山

轉運使瞿霆發墓在南匯縣下砂

江夏公費察墓在青浦縣陸寶原

宣慰副使任仁發墓在青浦縣駱駝墩

明御史袁凱墓在東門外賢游涇

侍郎王鍾墓在佘山 訓導邵亨貞墓在佘山

宣城伯衛炳墓在府城內北禪寺右

贈尙書張璠墓在城南龜蛇廟側

尙書錢溥墓在佘山 府丞朱孔暘墓在佘山

府尹吳玘墓在府東六磊塘

布政夏寅墓在府西白龍潭 知府張弼墓在鳳凰山

都御史唐珣墓在府城北荷祥涇

尙書張瑩墓 尙書張悅墓

尙書孫承恩墓俱在盤龍塘

修撰錢福墓在府東華陽橋

給事中張承憲墓在天馬山東南

太常卿夏衡墓在府城南彭家莊

贈大學士徐黼墓在景家堰西 尙書顧清墓在唐橋

太僕卿沈愷墓在北城濠上



侍郎徐陟墓在府城西南

尙書陸樹聲墓在北城濠北子刑部侍郎彥章祔

寺丞馮恩墓在古浦塘子通判旌表孝子行可祔

給事中楊允繩墓在葉謝河西

副使周思兼墓在蔡成涇 布政莫如忠墓在御史涇

尙書唐文獻墓在府城北

贈僉都御史楊樞墓在任淇浜徐階銘

副使楊道亨墓在修竹鄉太倉王世貞銘

副使龔愷墓在禦溪東陸樹聲志銘

給事中夏時正墓在古浦塘陸樹聲志銘

太常寺卿張明正墓在泖港吳涇太倉王錫爵銘

知府彭應麟墓在浦南龍溪徐階銘

諭德張以誠墓在朱橋鎮 大理卿朱奎墓在佘山

太僕卿林景暘墓在府城外

贈侍郎董體仁墓在望海塘

大學士錢龍錫墓在府城外

按察使杜喬林墓在壓薦浜

侍郎錢士貴墓在府城南 侍郎董傳策墓在新河

張節婦姚氏墓在鳳凰山

張烈婦陳氏墓在天馬山之陽董其昌書碣

楊烈女墓在澱山寺側華亭知縣鄭友元立傳

四隱墓在奉賢縣陶宅

楊仁壽李暉華  
謹一人逸姓名



詹事陸深墓在黃浦東 徵士陳繼儒墓在佘山

祭酒陳詢墓在奉賢縣瑤涇

侍郎蔡汝賢墓在奉賢縣望河涇

御史徐宗魯墓在婁縣秀野橋

處士殷澄墓在金山縣胥浦鄉

懷遠將軍侯端墓在金山縣秦山麓

主事徐三重墓在金山縣三保

僉都御史陸樹德墓在金山縣秀州塘

通政使許樂善墓在金山縣呂岡涇

大學士方岳貢墓在金山縣掘撻涇

副都御史唐瑜墓在上海縣周涇北

大理寺卿王霽墓在上海縣陸家浜

右通政趙灼墓在上海縣五里橋

侍郎顧彧墓在上海縣二十二保

孝子顧文敏墓在上海縣西門

侍郎張電墓在上海縣淡井里

都御史潘恩墓在上海縣陳涇

大學士徐光啟墓在上海縣徐家灣

光祿少卿顧從禮墓在上海縣日赤橋北

侍郎董羽宸墓在上海縣

都察院僉事俞汝為墓在上海縣龍華寺西長洲文震

孟銘



學士沈度墓在福泉縣薛山西麓

國朝總兵張仕傑墓在華亭縣三十九保西安人入籍華亭

處士王光承墓在奉賢縣蔡家橋

婁縣令李復興墓濱州人留葬鍾賈山

尚書王日藻墓在金山縣寒字圩

大學士王項齡墓在金山縣宙字圩

太常少卿高層雲墓在金山縣張堰

總督施維翰墓在南匯縣牯港

贈工部侍郎葉映榴墓在南匯縣

侍郎沈荃墓在福泉縣朱家莊

侯氏節孝阡在上海縣圓沙

### 常州府

社稷壇在府城北門外德澤鄉

風雲雷雨山川壇在北門外德澤鄉

勅建先農壇在府東郊壇旁置有藉田歲以仲春亥日行耕藉

禮

郡厲壇府城北門外縣曰邑厲里社鄉厲二壇在各鄉保

關聖廟在府城

國朝雍正五年奉

旨追封三代公爵全日祭于後殿

城隍廟在府城金斗門內

勅建八蜡神廟



劉猛將軍廟俱在府治西

以上壇廟所屬縣皆如制

忠佑廟在府城祀隋郡人陳杲仁西廡祀南唐右武衛

將軍柴克宏

劉將軍廟在府治清和坊明洪武初建祀宋都統制劉

師勇師勇山東人元兵陷城師勇從八騎手殺哨騎數

人易衣甲以混北軍斬裨將張超所向披靡從間道赴

行在

王太保廟在武進縣東南文成壩南祀晉王祥

化被王廟在縣東小井旁祀晉顧凱之或云卽凱之宅

水平王廟在陽湖縣分水嶺舊傳爲后稷庶子佐禹治

水故祀之

延陵季子廟在陽湖縣雙桂坊明洪武中建康熙四十

四年

聖祖南巡

御題讓德光前四字扁額

附

蔣超重建廟碑記

介丹陽金壇之交各五十里曰

延陵有吳君季子廟云自漢及今廟貌最古民間祈農  
 望歲疾病禱祀遠近至者無虛日君亦惠風甘雨默祐  
 一方野蠶嘉穀穹龜大魚充溢於溪田巷陌之間其民  
 樸而多壽豐財力穡而耻未富酉戌以來老幼熙恬寂  
 然不見兵革之事君之佑民可謂至矣廟素弘麗亟修  
 亟壞年來梁桷班剝藩削級移不能避燥濕修士吳嘉  
 侯患之安陽吳侯之鑊適宰於陽捐俸倡首屬嘉侯董  
 其事以君之靈克用有成嘉侯屬予記之欲以修建本  
 未載廟石不可不一至其地孟夏之日乃肅衣冠過舊  
 里西山送青溪溜縈注高岡聳抱若阿若盤沸井流珠  
 於右長橋虹貫於前廟門軒殿巍殿三重崇宮傑出雲  
 表仰瞻儀像披袞衣列班劍肅然如生露臺有奉夫子  
 十字碑亭巖巖亂結丹紺耀日修廊蜿蜒環兩旁者九  
 十餘楹厥後又有讓王樓翼以邑大夫齋宮無不畢具



噫君之靈應與吳侯之勤民嘉侯之好義盡於此矣予  
獨思當春秋時志興王室者唯吾夫子耳君為文武子  
孫備知三代禮樂又序次當立以大聖人輔一賢侯足  
使東周復興生民被澤譬然高蹈又處人倫骨肉之變  
此君之大痛亦吾夫子之憂天下之不幸也雖然自君  
以讓德顯天下被其教者無智愚貧賤皆知重倫義輕  
祿位以推梨讓棗為足欽奪芻蕘骨為可恥由其道可  
以無爭無爭無刑無刑無兵君所造於後世者豈止療  
疾苦而禦饑凶也哉以此思愛廟食千萬世可也詩曰  
粵有太伯國以讓延壽夢象賢曰有季存燭瓘吳君惟  
義之耽腐鼠嚇鵠憫彼鴟頑當周之衰君為同姓誅亂  
定王姬可不亡傲差濁膠不救俗荒句茅之西延陵之  
里佳城鬱葱穹窿厥祀冥靈蕃育豐年大有溪深魚肥  
士敦穀阜峩峩素王編紵遺之赫赫穹碑蛟龍護之公  
孫嘉侯世奉君廟吳侯善刀登良戰暴既惠吾民亦謹  
於神運會適符各匯其源靈堂歲久欒櫨漸傾乃命鼎  
新嘉侯董成風斤雨斲神輪鬼營鐵石犀壽髹彩晶瑩  
乃構元孱用表休尚夷清惠和君聖之讓粒我蒸民既  
富且臧孝友睦  
媼以配神貺

顯忠廟在無錫縣秀塍街祀唐張巡

金龍大王廟在無錫縣石頭鋪祀黃河神宋謝緒

至德廟在金匱縣梅里鄉祀吳泰伯明洪武中移置縣

治東弘治中重建於梅里

孔氏家廟在江陰縣梧塍里明嘉靖間孔氏六十四世

孫抃建祀孔子

國朝張能鱗重修梧塍孔氏家廟碑記 山祖崑崙其分也名

小牙錯分鎮九有水祖宿海其出也巨為四瀆細為萬  
川淺深交淪滋浥萬物人祖聖人其發也瓜瓞雲仍本  
支綿亘上衍先澤下裕後昆蓋積厚者緒長榦豐者枝  
繁也開闢以來聖莫盛於孔子孔子殷人也虞廷五相  
契作司徒敷五教其後大於商湯以帝制六百祀而周  
代之周衰代周者其在湯孫乎吾夫子繼周而起稱素  
王天之命也天若曰作君而王者吾王之勞以萬世其  
建號也有涯作師而王者吾弗王之勞以萬世其稱名  
也無涯斯孔子之道所以集羣聖之成而孔子之子若  
孫所以邁羣聖而最熾也表章聖裔助於元朔易代加



崇至於今隆比三恪於赫哉無疆惟休歟支流別子散  
在寰區莫不克振祖烈稱彬彬焉江陰梧棲孔氏其一  
也梧棲之有孔氏始武功大夫屋紹興間以統制守江  
陰軍因家焉十四傳為處士拊始建聖廟又三傳為諸  
生與綱毓珺移建於西莊大擴舊制其堂以奉先聖祖  
也配以述聖宗也次配以武功梧棲所自始也其聽事  
以供祭人東廡以祀有德西廡以祀有功示勸也其田  
倉者共祀春秋聯族屬也其族姓愿樸而力田諸生好  
德而文以世其家語有之七世之廟可以觀德繇孔氏  
以觀聖德不猶望京山之峩峩而懷崑崙觀清流之洋  
洋而溯宿海耶戊戌秋予命祀生重修逾月告成諸生  
請記於予以垂久遠予於是嘆吾道之大而聖人之尊  
不可褻也二氏之教浸淫於人心其宮廟祠宇克塞天  
下優俳奴隸得而創之薦以褻味祝以淫詞其徒方自  
以為恭而不知褻乃滋甚也敬在外非由內也吾夫子  
之祀京師郡邑而外罔敢褻舉舉之者非奉詔旨則聖  
人之後也而吾夫子在天之靈赫赫洋洋陟降左右士  
自入廟始敬也敬在內非由外也子故為文以示孔氏  
必入廟始敬也敬在內非由外也子故為文以示孔氏  
子孫而不僅以示孔氏子孫也司馬子長道魯過闕里  
見車器竹策皆有先民遺風流連不忍去蓋聖德入人

深也時方出秦焰子長所謂道六藝耳今天下聖道昌  
明士習畫一躋斯廟者覩俎豆禮器畢然其有思乎豈  
獨聖人之子若孫  
勉焉願學聖人也

袁府君廟在宜興縣治西南祀漢陽羨令袁玘

許真君廟在宜興縣青陽市祀晉許謚相傳即真君宅

忠烈行廟在宜興縣姚村祀漢秣陵尉蔣子文

尚書廟在宜興縣青陽市祀明周忱

烈女廟在宜興縣順一坊祀五代時何氏氏罵賊死

函亭侯廟在荆溪縣五賢區祀漢蔣澄

周孝侯廟在荆溪縣治東南隅祀晉平西將軍周處

義興太守廟在荆溪縣臨津城祀齊任昉

夏王廟在江陰縣夏港口



張睢陽廟在江陰縣虹橋西祀唐張巡靖江縣亦有祠

陳烈士廟在江陰縣新村祀宋陳忠

忠義祠在府西門

節孝祠在直街圖 二祠所屬縣俱如舊制

卞忠貞祠在府城勝西里

范文正祠在府署西南隅

蘇東坡祠在府治顧塘橋北

國朝康熙四十四年

御題坡仙遺範四字扁額又有祠在荆溪之蜀山即東坡書院

明弘治中侍郎沈暉重建 附 明李東陽蜀山蘇公祠記

常州宜興之荆溪有蜀山本獨山也志稱蘇文忠公與  
蔣學士之奇同舉進士買田卜築於茲山之麓於是易

獨為蜀按爾雅山獨者皆為蜀志又稱愛其名而居之  
者理則然也公嘗欲作亭種橘預名曰楚頌後上表乞  
居常及歸自嶺南卒於州邸其弟文定公以其喪去葬  
於潁上其家亦不復至常矣當是時蓋有所謂東坡書  
院者尋輒廢越七十年郡守晁子健擇州學旁地建祠  
祀公元僧敏機因山為祠為之居守晁公武徐一夔皆  
有記今常州祠尚存而蜀山祠廢已久弘治庚申縣人  
沈公暉自南京工部侍郎致仕歸以告巡撫都御史彭  
公禮巡按御史王君憲知府連君盛知縣王君鏞僉議  
既協鏞躬訪遺址悉為居民所據贖而歸之得地三十  
餘畝一時好義者爭割田山捐金市以益之士人吳綸  
輩鳩材督工國子生王永實相其役經始於辛酉之四  
月至十二月而成為堂六楹肖公像於其中堂左右二  
亭一刻公楚頌帖及諸詩詞一刻與造之碑東西廡及  
門各四楹廳館庖湏諸室為楹者以十數其外則甃石  
為周垣百二十丈視州祠深廣畧稱而偉麗過之矣既  
乃用表忠觀故事命道士謝允昂居之歲奉祀焉夫天  
下之論名臣碩輔者或原於獄降或歸之地靈文章氣  
節亦以為得江山之助固也及乎遐陬僻壤一邱一壑  
或有所憑藉亦足以不朽於世是所謂人與地者恒相  
須以顯而亦不能不相為重輕若君子去父母之邦則  
遲遲其行越在他國則觸物感事懷思顧戀而不能已



是蓋存乎人而物不與焉會稽東山以謝傳名其在金陵亦築土以象之為東山者何限而非其人莫之名也公之自蜀入洛隱然重京師父子兄弟之名遂擅天下則公乃天下之人俗傳三蘇生而眉山之草木皆枯者妄也及其流離貶竄不能歸其鄉卜居茲山托名以寄意頽之山名曰峨眉者亦此義耳後雖其體魄在頽而魂氣之無不之者安知不徘徊眷戀於茲山也耶且公所謂不待生而存不隨死而亡者將流行充塞於天地間而况其經過化存神之地哉公之文章氣節天下莫不尊之是雖不得與天下之祭揆之鄉先生社祭之義有過而無不及獨山之為蜀也其社之類乎然則是祠之設固者民俊士衣冠俎豆所宜周旋而傾注焉者也夫使文章不如公氣節不如公則蜀之王萬亦嘗榜鄭邸為蜀舍而朱俊民劉歧為之記銘然亦不顯東陽楚人而燕產嘗因贈太師徐文靖公之約買田茲鄉而遽罹家難竟莫之遂今工部以其迹頗相類而不知其文之弗稱也請為記祠事之成予於是亦誠有感焉因用楚語作迎送神辭其亦橘頌之遺意也夫其辭曰橘之樹兮如蓬鬱青葱兮間玲瓏彼亭兮在中信吳邦兮楚風橘之樹兮如蓋採芳鮮兮薦甘脆我公兮來歸神陟降兮如在公之樹兮荒萊公之亭兮空苔望遊魂兮歸來公歸來兮恍不可以見渺惆悵兮悠哉荆之土兮如

酥荆之米兮如珠山有茶兮溪有魚生不足兮歿有餘公去此兮何居楚之調兮歛歎蜀之山兮盤紆神往復兮無定所聊為此兮踟躕生不為世所容兮沒將恣其所如鑿余井而得泉兮又安窮其所之彼亭常存兮樹常實持以薦公兮願少駐乎須臾

國朝儲欣蜀山東坡書院記

先生蜀人也弱冠筮仕嗣後出入中外不常厥居有以除授至

者徙者請外者羣小構禍安置者量移者地或善或惡或極遠以惡寵辱自上趨避無由若乃擇地而處不以宦與罪至而意氣慨然將徜徉終老於其山水之間獨吾陽羨而已蜀山處邑東南蓋陽羨諸山之卑且獨者相傳舊號獨山先生以山形似蜀為去偏名蜀而居之吾意先生舟入荆溪浮於東沈三十里得是山登巔極目太湖如鏡東南萬峯如笏如屏是山實山水門戶先生善選勝即其址稅駕焉而非係乎蜀之似與不似也從此泛菴畫品玉潭芒鞋筇杖無不到田夫方外無不交於是天遠夕陽之詞亂山白雲之句紅友黃封之歡與金沙寺僧剖竹調水之符佳言韻事日日以新而惜乎居之不久也間考先生之來大約在允常州居住前後為元豐七年八年此兩年中離黃赴登又嘗待命於泗留題於揚時月可考是則先生居此雖閱兩年其實



不過數月耳嗟乎先生一謫齊安居之者四年一竄南海居之者六年及心所喜樂買田築室曾不數月以去亦足見行止非人而先生生平動與願違若此類甚衆也然先生在天之靈亘百世不磨滅者其所依回眷戀將在鬱鬱不樂處者歟抑在所樂歟則夫陽羨人士相與作為宮室以俎豆先生者先生之靈實式憑之可壞陋弗飭耶蜀山故有東坡書院廢不知何時明弘治朝邑沈侍郎暉贖舊址而鼎建焉以偉麗稱

先賢祠在府城內祀延陵季子等七十五人

邵康節祠在府治漳湟里祀宋邵雍

劉龍圖祠在府治馬跡山祀宋劉晏

楊龜山祠在府治朝京門內

張南軒祠在府城祀宋張栻

胡文恭祠在府城德安門外祀宋胡宿

忠義祠在府城正覺寺址祀宋文天祥姚訔等十五人

附明胡華毘陵忠義祠錄序 毘陵古常郡也而祠以忠義名天下所無也而吾常有焉常之忠義前此猶未顯也至宋之末始大顯焉忠義在人心固未嘗民宜無間於天下古今而獨歸於宋

未者有說也蓋常有泰伯季子之遺風自古高節所興由克遜以立風俗君子尚義庸庶厚龐漢魏而降衣冠南度禮義之俗寢盛迨至趙宋人以忠厚立國當時臣民咸有忠君愛國之心而常之人才風俗愈甚獨異他郡處常守易寂無所見也時危事變節斯著焉方德祐初元師入境大江東西郡縣皆望風奔潰獨吾常知州姚公嘗通判陳公紹與統制王安節等鼓舞忠義為守禦計且誓與城同存亡卒之糧盡援絕義勇百萬同日被戮無一人降滿城忠義信古今天下所無而僅一見於吾常者也夫以常之忠義如此至今廟宇不崇祭享不及精忠大節幾於晦塞不有君子表而出之愈久而忘終歸泯沒何以勸激天下後世又何以顯常之忠義



超絕古今也耶此吾葉君司韶有所感發督合庠友而私祭所由興私祭典而新錄所由著也觀其於文丞相劉都統阮應得萬安僧則議其應祀劉溶則議其不當黜定位次有議人各有贊序列傳鑑志以著其出處詳畧祭有期有品有文立祠有碑與侵毀祠基宇有帖有狀君嘗乞祭於有司有呈古人感慨於忠義有詩一收錄分爲上下卷後自爲序而列其目於卷首用心密矣旻兒輩俱出門下見而義之將爲鉞梓以廣其傳君因先期呈書臬司俾余序焉余惟忠義之事惟忠義者知所崇重爲能表而出之以勵風化昔孔北海表鄭公鄉而過者起敬文潞公題明道墓而學者知歸吾見斯錄一出而毘陵忠義之名益著忠義著而諸公之英聲偉烈震耀兩間人人知所景仰吾輩又當以君之錄達於朝行將立廟奉祀勒石頌功隆一代崇褒之典而大顯揚於時於以勵高風激頽俗匪直有勸於常抑有勸於天下後世是錄有關於忠義大矣

鄒公祠在府治咸寧街祀明蘇松兵備道鄒墀  
 唐荆川祠在府城外運河岸西南祀明唐順之  
 忠節祠在府城正覺寺西祀明兵部尙書陳洽

王忠愍祠在府治奔牛鎮祀明季殉難御史王章  
 國朝順治十年奉

旨褒卹賜地十區奉祀

海烈婦祠在府治運河岸  
 靈濟龍祠在武進縣奔牛牖  
 周殿撰祠在武進縣忠佑廟西廡祀宋周杞  
 崇賢祠在武進縣史家巷祀明胡濙  
 劉仁賢祠在武進縣南祀明大理寺丞劉光斗  
 三王祠在陽湖縣東北祀東嶽忠佑廣惠之神  
 湯襄武祠在陽湖縣祀明東甌王湯和

顧左丞祠在無錫縣南林祀晉顧悅之  
晉書愷之父悅之歷尙書左丞



伍相公祠在無錫縣西五十里胥山下關江上

春申君祠舊在黃公澗上今徙錫山西麓

華孝子祠在無錫縣惠山左祀晉孝子華寶附元高明

華孝子祠記惠山寺之東偏當泉水之上有三賢祠按

志書今祠址華孝子所居宅也初祠久廢吳人王彬始復倡建既成則以三賢事刻諸石且曰初址實孝子故居孝子之事不可以沒而不著復礱其碑因以記其事章善也孝子名寶晉義熙末始八歲父豪戍長安且行謂曰我還為汝冠後長安陷父歿寶奉命至七十不婚冠或問之不忍答輒號慟彌日建元三年詔表其門閭凡史載孝子事若此蓋自西晉以來尚淵虛賤名檢教弛法數波流風靡而孝子獨能篤至行終始不渝其誠意惻怛可以貫金石于雲霓若與宇宙日月同其久於此見天之降衷人之秉彝不以衰世末俗而有異也孝子晉人而志謂齊孝子者蓋孝子生於晉長於宋歿於齊當其一身而天下三易姓當時居朝廷有爵位者朝事司馬氏夕事劉朝事劉夕事蕭恬不以為怪而孝子奉父一言七十年餘未嘗斯須忘以至歿身不替使當時朝廷有爵位者其奉君命恪官守亦咸

若華氏子則晉不當為宋宋不當為齊而孝子宜不曰齊孝子也凡遊於茲者憇幽林酌清泉臨風覽古懷三賢之高風慕孝子之至行有志者宜加奮勵其未能者則澄思革心勉追遐躅是則某所以樹碑之意云耳夫人性一耳有為者亦若是吾徒宜無自怠

尊賢祠在無錫縣惠山泉左祀唐陸羽湛茂之李紳明

正德中增祀宋焦千之秦觀尤袤錢顛元倪瓚張翼王

紱共十人嘉靖間又增祀明秦旭邵寶華察龔廷祥薛

天生劉懷穎六人

國朝康熙六年增祀鄒迪光沈應時二人五十八年又增祀

本朝秦松齡周弘嚴繩孫三人共二十一人

胡安定祠在惠山右祀宋胡瑗

李忠定祠在惠山西祀宋李綱



七賢祠在無錫縣儒學內祀宋楊時暨其從遊四人名  
五賢祠明嘉靖初增入宋李綱明邵寶更號七賢祠

朱文公祠在無錫縣梅里鄉白捨山下

麻尹二將軍祠在無錫縣五牧橋祀宋文天祥部將麻  
士龍尹玉舊在彭郎村明嘉靖間薛應旂移建今所

儲貞義祠在無錫縣淨慧寺側祀明義士儲福及其妻

范氏

鄒文忠祠在無錫縣惠山河塘上祀明提學副使鄒迪  
光

松滋王公祠在惠山秀塍街祀明無錫知縣王其勤

周海二公祠在無錫縣惠山左祀明周忱海瑞

高忠憲祠在無錫縣水缺巷祀明高攀龍

周文恪祠在無錫縣惠山祀明周子義

顧洞陽祠在錫山之麓祀明副憲顧可久

顧端文祠在惠山寺左祀明顧憲成以弟允成配

邵文莊祠在無錫縣惠山二泉書院祀明邵寶

于忠肅祠在無錫縣錫山祀明于謙

馬文肅祠在惠山秀塍街祀明季殉節馬世奇以同殉

朱氏李氏二妾祔

國朝順治十年

賜諡并祠田七十畝

單貞姬祠在無錫縣惠山寺左



忠節祠在無錫縣惠山祀卹贈國子監助教嵇永仁雍正八年建

御賜忠節流芳四字匾額

張正齋祠在金匱縣洞虛宮之右祀明義士張翼

秦淮海祠在金匱縣第六箭河上祀宋秦觀舊在惠山

明正德間改建今所嘉靖中以裔孫朴旭霖夔四人配

祀崇正時又增配永孚仲孚鏗金四人改稱九先生祠

國朝順治初又以秦銳附

道南祠在金匱縣東林書院左祀宋楊時

伍相祠在宜興縣西九里祀伍員又一在江陰縣胥湖

西

廣惠行祠在宜興縣西門外祀漢張渤

謝氏七賢祠在宜興縣祀晉義興太守謝淵洎其後裔

宗三惠顯表三錫遴

二忠祠在宜興縣東祀唐衛將軍逖尙書吳公雲附唐

許渾衛將軍廟詩并序將軍名逖陽羨人少習詩書學

遇神堯皇帝始建義旗逖以勇藝進備行列洎擒竇建

德逖時挾鎗劔前突後翼太宗顧而奇之天下旣定錄

其功拜將軍宿衛以母老且病乞歸侍殘年詞旨哀激

詔許之旣而以孝敬睦閭門以然諾居鄉里及卒邑人

懷其賢廟于荆溪之湄以平生弓甲懸東西廡下歲時

祠祭頗福其土焉文士王敖撰碑詞實詳備惜乎國史

闕書其人因題詩於廟壁武牢關下護龍旗挾槩彎弓

馬上飛漢業未與王霸在秦兵已散魯連歸墳穿大澤

埋金甲廟枕長溪掛鐵衣欲奠

忠魂何處問葦花楓葉雨霏霏

二侯祠在江陰縣虹橋東祀明初江陰侯吳良靖海侯



吳貞

愍忠祠在江陰縣城隍廟西祀明光祿寺少卿錢錞

義勇祠在江陰縣青陽鄉南街祀明嘉靖時死難團長

吳兌

義士祠在江陰縣順化坊祀明嘉靖時義士黃鑾

耿公祠在靖江縣東南相傳耿為宋哲宗時人歿而為

神能除水患

岳忠武祠在靖江縣治西又宜興亦有祠

四賢祠在靖江縣孤山頂祀元趙孟頫虞集孔元度孫

一元

四惠祠在靖江縣馬洲書院祀邑令金洪易幹張師載

鄭錡

烈女祠在靖江縣治東北五里祀元至正中烈女陳元

孥明孫馮二氏

商泰伯墓在金匱縣鴻山高一丈四尺周三十五步鴻山

蓋卽南徐記所謂皇山也晉晉陵太守殷師嘗表其墓

復一戶護守

周吳季子墓在府治北七十里申港有石碑古篆曰嗚呼

有吳延陵君子之墓相傳孔子所書附明都穆墓碑攷

吳延陵季子墓在常州江陰縣西申浦墓故有碑曰嗚呼有吳延陵君子之墓自昔傳以為孔子之筆其大徑

尺體勢奇偉攷之唐開元中元宗嘗命揭其書大曆十

四年潤州刺史蕭定重刻石延陵廟中今碑之存者乃

宋崇寧二年知常州事朱彥立蓋刻之者屢矣歐陽永叔好集古文其論此碑本之太史公書謂孔子平生未



嘗至吳不得親銘季子之墓又謂其字特大非簡牘所  
 容後永叔有趙明誠者錄古金石多至二千而此碑不  
 與遂使好古之士不能不置疑其間穆嘗讀越紀見其  
 中載越王勾踐躬求賢聖孔子從弟子七十人奉先王  
 雅琴治理往奏則孔子固已歷吳至越其書近古言似  
 非偽豈太史公未之見耶况春秋之時賢如季子固聖  
 人之所與今觀十字之間辭約意博宛然魯史之法有  
 非聖人不能及者蓋不必親登其墓而後表之亦未可  
 知也但觀之筆以竹而紙以代簡則自漢始及觀古法  
 帖亦有是文大不逾寸而多二言庶幾竹簡之書宋黃  
 伯思號稱博物定其非偽今碑字若此豈真是耶抑後  
 人轉相傳摹擴而大之又未可知也雖然元宗嘗命榻  
 本則唐以前已有刻字而其來遠矣又豈後人所敢議  
 耶監察御史謝公球巡歷吳中謂穆吳人頗知稽古命  
 知縣事王君鉞考其說遂著之云爾

春申君黃歇墓在江陰縣君山相傳在東嶽廟陞之下

漢刺史劉繇墓在府北濱江史稱繇卒於豫章孫策載其

喪還葬

僕射劉昌墓在無錫縣西南白石山即今胥山

御史虞仲卿墓在無錫縣朱山王莽逼為司徒不從死

之葬此光武即位以朱幡表其墓因名朱山

荊州刺史顧容墓在無錫縣東南一十八里俗呼為顧

墓

雲陽鄉侯蔣默墓在宜興縣竹山

山亭鄉侯蔣澄墓在宜興縣都山

諫議大夫蔡邕墓在武進縣

陽羨令袁玘墓在荆溪縣君山

太尉許馡墓在荆溪縣南門外周瀆

晉琅琊王墓在府城西五里運河南即今所祀之琅琊王



神也

將軍曹橫墓在陽湖縣橫山冲虛觀宋縣令潘洞得巨磚有咸康八年右將軍散騎常侍字

孝子華寶墓在無錫縣惠山華坡有祠

陽羨侯史韶墓在宜興縣西山寨西

將軍周處墓在荆溪縣治英烈廟後

義興太守劉超墓在荆溪縣永豐鳳飛嶺今福泉菴其墓剝也

郭璞母墓在江陰縣申港八里許

南北朝齊光祿大夫王琨墓在無錫縣東北二十五里

陳江陰王墓在江陰縣良信鄉陳受禪奉敬帝爲江陰王

殂葬於此

湘陰侯蔣有政墓在宜興縣白塔村山亭侯裔孫也

隋司徒陳杲仁墓在府陳灣山相傳山以墓得名

唐刺史滕邁墓在無錫縣新橋門外

平章事李紳墓在金匱縣東五里紳父悟官晉陵令因家於錫之梅里鄉父子並葬於此

將軍衛逖墓在荆溪縣許墅臨大溪

丞相李蟻墓在荆溪縣

丞相高智周墓在荆溪縣葛墟村

南唐將軍柴克宏墓在陽湖縣柴墅

宋忠定張燾墓在府境元時被發



知州許琮墓在馬跡山大墅灣琮子季玉年十八登乾道二年進士擢知制誥以忤權貴謫知汾州盡心民事人頌之又有探花許必勝墓亦在馬蹟山琮之後也

直龍圖閣鄒浩墓在青山門外地名林莊墓道在直街西浩崇寧中歸自嶺表政和初卒葬此嘉定間郡守胡衛命教授趙絀卽墓建庵給田贍祀事附元脫脫木兒

復修鄒忠公墓詩序

至正庚寅冬常之監郡太守率僚屬祭道鄉先生鄒忠公之墓士君子莫不賦詩以頌休德俾予題其端予惟道鄉先生實

故宋之忠臣當元符間正言極諫務去奸邪以清弊政而整綱常言弗見施譴黜不悔載諸史傳赫赫猶在人耳目萬世祀之不可泯也自元兵平宋迄今百餘年松楸淨盡地亦在村疇漁牧寒烟野草間獨遺塚存焉吁可憫也問之監守是郡者未嘗一至而訪其事日往月來其不沒於耕犁者幾希矣今二公以內朝之碩臣出莅茲邦未逾年政平人和兇遁姦革既底於理而又崇

學校之教訪前賢之迹百廢具興行前人之所未行於是郡人謝子蘭乃上鄉事以請二公樂從之卽歸墓田籍於學至是具牲帛親抵於郊以祭爲之伐穢榛剪與草立華表以聳瞻視求斷碑而獲遺文則久荒之墓復蔚然於林莊矣及歸仍命構祭亭樹松柏立石以記若二公者非有忠君之盛心惡能舉忠臣之墜典哉遂不辭而書其實用達於廊廟得人者

都統王安節墓在府城西關內四世孫伯璵耐伯璵江西進士以其祖殉節於此乞改教於常因家焉

兵部錢治墓在武進縣旌孝鄉北原歐陽修表墓

參政張守墓在武進縣朱夏墅

知縣邵文炳墓在武進縣魏村鎮北文炳知於潛有循

政敕建墓塋

太守李餘慶墓在陽湖縣橫山



侍郎張鑄墓在陽湖縣許村

侍郎孫覲墓在陽湖縣毛家橋之西

樞密胡宿墓在陽湖縣萬安鄉歐陽修誌銘

教授周孚先墓在陽湖縣安上鄉殷坂弟恭先亦葬此

明郡守李嵩立碣墓側有祠

侍郎霍端友墓在陽湖縣千墩孫覲志

尚書卞長卿墓在陽湖縣永勝西鄉

學士蔡戡墓在陽湖縣壺公山

贈直龍圖閣秦觀墓在無錫縣祭山政和中葬高郵子

湛倅常州遷葬於此子孫因家焉弟覲字少章墓在大

坯山附宋失名重修墓記

淮海先生秦少游建中靖國初卒藤歸葬高郵致和中遷

葬於常州無錫縣惠山之原子孫因家焉墓故有亭刻建炎四年追贈龍圖閣誥並山谷送秦少章詩置之亭

中秦氏仕不顯諸孫貧窶墓四旁地皆為豪右所得亭亦毀壞不存山谷詩石歸邑好事者獨贈碑荒蕪榛杞

中樵蘇不禁墓祭幾絕開禧丙寅永康應純之以州判官攝邑事訪問遺蹟慨然與念封殖其墓取旁近地還

之率邑士大夫合錢建亭乃立贈碑且贖還詩石擇秦氏諸孫知學者使肄學職得月給使具祭祀倉臺黃公

常守湯公皆助其凡費應君故從余學余自澄江召歸道出無錫應君首及茲事且請余記之余嘉其志不待

再請然行役未及作也至吳門會淮東漕孟良夫因論少游醉臥古籐陰下人謂卒於籐之讖也獨未知一事

少游墓後古松一株直幹高聳有巨籐自墓穴中出周匝數四已乃施於松上蓋覆其墓此真古籐陰下也松

為人所去籐芽暨今僅存耳良夫信安孫慧山寺功德院也故知其事應君來索記因並及之

尚書章誼墓在無錫縣開原鄉橫山

待制李夔墓在無錫縣湛峴山夔丞相綱父也先是綱

葬母楚國吳夫人手植松柏數萬株規畫甚整及父卒



合葬焉先後各廬墓三年

信安郡王孟忠厚墓在無錫縣孟灣忠厚字仁仲洛州人隆祐太后兄子高宗時封信安郡王贈太保

魏國夫人墓在無錫縣白茅山夫人姓沈氏太師洪皓妻丞相适母适爲文表墓曰慈塋

循王張俊墓在無錫縣青山灣俊字子英成紀人官節度使封清河郡王追封信王諡忠烈高宗御書碑額曰安民保泰翊戴元勳之碑建寺墓旁以奉歲祀元時被發

提舉喻樛墓在無錫縣回溪里五里涇

尚書尤袤墓在無錫縣西孔山

祭酒李祥墓在無錫縣湛峴山

學士尤焞墓在無錫縣東孔山

侍郎蔣重珍墓在無錫縣西四十五里謝堰

提幹孟文龍墓在無錫縣許峴山

監州麻士龍墓在無錫縣惠山德祐元年元兵下常州文天祥遣部將麻士龍尹玉援之戰於橫林死之因葬於此

提舉强以德墓在無錫縣粲山以德嘗買山四百畝爲義塚其地亦在粲山

處士王仁輔墓在無錫縣惠山倪瓚爲之營葬

直學士陳襄墓在宜興縣箬山



學士汪藻墓在宜興縣梅林

樞密王淵墓在宜興縣羅漢山

丞相蔣芾墓在宜興縣孫墓

待制岳霖墓在宜興縣唐門顯祖庵側忠武王飛子

尚書吳忠旦墓 尚書吳邦翰墓並在宜興縣萊村

通判賀鑄墓在荆溪縣篠嶺

樞密蔣之奇墓在荆溪縣滄浦

樞密胡松年墓在荆溪縣梅林

樞密郭三益墓在荆溪縣橫澗

尚書沈積中墓在荆溪縣西坑

叅政周葵墓在荆溪縣梅林周必大撰碑

太尉王琪墓在荆溪縣篠嶺

宣撫使胡世將墓在荆溪縣橫山

太師姚端珪墓在荆溪縣大蘆山

制置使邱密墓在江陰縣由里山東南

太常葛勝仲墓在江陰縣由里山南

丞相葛邲墓在江陰縣青陽鄉

侍郎邱壽雋墓在江陰縣敵山

元叅政陳祖仁墓在武進縣蠡河東學士李時勉志

廉訪副使陸垕墓在江陰縣沙山北

孝子趙鉉墓在江陰縣沙山

明陶將軍墓在府元妙觀前明初戰沒葬此



贊善陳濟墓在府茶山路西

御史錢一本墓在武進縣

都御史唐順之墓在武進縣陳渡村

御史王章墓在武進縣安善鄉

都御史王慎墓 都御史王沂墓俱在陽湖縣三保橋

尚書白昂墓在陽湖縣定安里大學士李東陽誌銘

尚書周金墓在陽湖縣者塘

謝應芳墓在陽湖縣橫山南

尚書孫慎行墓在陽湖縣東門外金樞里

巡撫許鼎臣墓在陽湖縣青龍橋

巡按劉熙祚墓在陽湖縣南湫

尚書陳洽墓在陽湖縣三橋東南大學士曾棨誌

義士張翼墓在無錫縣章山

處士華興叔墓在無錫縣鵞湖興叔字仲諄感異夢卽

湖中填土築墓形家至今傳爲奇穴

尚書張籌墓在無錫縣章山

尚書俞溥墓在無錫縣章山

都御史楊璿墓在無錫縣長腰山

都御史盛顥墓在無錫縣惠山

贈中憲大夫秦旭墓在無錫縣龍山

布政秦夔墓在無錫縣惠山

孝子秦旦秦爽旦子鏗三墓在無錫縣龍山



尚書邵寶墓在無錫縣惠山

尚書秦金墓在無錫縣歸山薛墩

都御史談愷墓在無錫縣開原鄉太平墩

尚書周子義墓在無錫縣惠山子侍郎炳謨祔

侍郎孫繼臯墓在無錫縣白茅山

都御史萬象春墓在無錫縣大池

尚書嚴一鵬墓在無錫縣陽溪之南

都御史秦耀墓在無錫縣大浮山

左都御史高攀龍墓在無錫縣祭山

侍郎張有譽墓在無錫縣馬鞍塢

諭德馬世奇墓在無錫縣龍山馬鞍塢二妾朱氏李氏

祔

中書龔廷祥墓在無錫縣

員外華允誠墓在無錫縣惠山石門

高士倪瓚墓在金匱縣芙蓉山

布政華昶墓在金匱縣延祥鄉

光祿卿顧憲成墓主事顧允成墓並在金匱縣梅李鄉

都御史楊得安墓在宜興縣小謝

副都御史杭淮墓在宜興縣百瀆

尚書萬士和墓在宜興縣明珠山

尚書曹三暘墓在宜興縣瑯玕山

左都御史陳于廷墓在宜興縣毫村



大學士徐溥墓在荆溪縣南陽山

尙書吳儼墓在荆溪縣梅林

都御史胡忠墓在荆溪縣鳳凰山

尙書盧象昇墓在荆溪縣西洋界

尙書周鼎墓在荆溪縣篠嶺

江陰侯吳高墓在江陰縣觀山高江國公良之子

沙將軍墓在江陰縣馬鞍山下

尙書徐晞墓在江陰縣綺山

大理卿湯沐墓在江陰縣由里山北麓

諭德繆昌期墓在江陰縣長涇

御史李應昇墓在江陰縣 處士李如一墓在江陰縣

侍郎葉茂才墓在江陰縣馬鎮無錫人

孝子吳鳳墓在江陰縣夏港東南

國朝大學士呂宮墓在武進縣繆賢壩

戶部尙書趙申喬墓在武進縣棲鸞鄉

工部侍郎周清原墓在陽湖縣江村

副都御史徐元洪墓在陽湖縣涇湖濱

叅議秦鉞墓在無錫縣歸山

中允嚴繩孫墓在無錫縣蕭家灣

諭德秦松齡墓在無錫縣開元鄉南塘

鎮江府

社稷壇在府治虎踞門南



風雲雷雨山川壇在府治虎踞門南

勅建先農壇在府東郊壇旁有藉田歲以仲春亥日行耕藉禮

郡厲壇在定波門外縣曰邑厲里社鄉厲二壇在各鄉保

關聖廟在府治江坊口

國朝雍正五年奉

旨追封三代公爵全日祭于後殿

城隍廟在府西南附宋陸游記漢將軍紀侯以死脫高皇帝於滎陽之圍而史

失其行事司馬遷班固作傳弗載也維宋十一葉天子

駐驛吳會改元乾道正月甲子右中奉大夫直敷文閣

鎮江府方滋言府當江淮之衝屏衛王室號稱大邦自

故時祠紀侯為城隍神莫知其所以始然實有靈德以

庇其邦之人禱祈崇禴昭答如響紹興隆興之間北兵

入塞金鼓之聲震於江壖吏民不知所為則維神之歸

雖北兵畏天子威德折北不支退舍請盟府以無事至

於流徙蔽野兵民參錯而居處弗驚疾癘以息則神實

陰相之吏其敢貪神之功以為己力乎謹上尚書願有以褒顯之以慰父子兄弟之心越三月癸丑有詔賜廟額曰忠祐詔下而方公為兩浙轉運副使右朝散大夫直徽猷閣呂公擢來知府事侈上之賜五月癸亥大合樂盛服齊莊恭致上命神人協心霽雨澄霽雲風肅然來饗來臨於是呂公以屬某曰願有記焉某惟紀侯忠奮於一時而暴名於萬世功施於漢室而見褒於聖宋身隕於滎陽而血食於是邦士惟在力為善而已豈有其善而不享其報者乎吏之仕乎是邦者必將有事於廟有事於廟者必將有考於碑其尚知所勉焉毋為羞神

勅建八蜡神廟在府治東

劉猛將軍廟在府治東以上壇廟所屬縣皆如制

東嶽別廟一在陽彭山一在戴港鎮

西嶽別廟舊在府治雲勝山下

夏禹王廟在府治禹跡山上又一在金壇縣沙湖



三真君廟在府治塔山祀周唐葛三真君  
漢荆王廟在府治前祀漢荆王賈

武烈別廟在府治朝陽門外祀隋陳杲仁又有忠祐廟  
在金壇縣治東北

旌忠廟在府治通吳門外祀宋韓世忠  
真武廟在府治北固山南

下元水府廟在府治金山

金龍四大王廟在京口王姓謝名緒宋國戚也憫宋將  
亡隱杭之金龍山築望雲亭居焉聞謝太后北行赴茗  
溺水死明洪武初封王爵萬曆末運糧軍及商賈建廟  
於此

龍王廟在北固山

白龍廟在府治常山麓

瓜步江神廟在府治金山

漢留侯廟在丹徒鎮祀張良

康王廟在丹徒縣城隍廟西廡祀宋康保裔洛陽人與

契丹戰死之

水府三官廟在丹徒縣南牖下

壽邱司徒廟在丹徒縣上河街祀壽邱山神南唐封為

司徒

漢王廟在丹陽縣閻塘祀高祖又一在越塘祀光武

延陵季子廟在丹陽縣延陵鎮西北又一在金壇縣顧



龍山 白鶴三仙廟一名三仙院在丹陽縣西十五里鍾離村

宋紹興間建

孱陵侯廟在丹陽縣呂城鎮祀吳將呂蒙

靈濟廟在金壇縣治南祀龍神

袁太守廟在金壇縣三洞鄉祀晉袁宏

伍相廟在溧陽縣西南護牙山伍員破楚取道經此

貞義女廟在溧陽縣北鳳皇橋黃山里祀史氏女見吳

越春秋

顯惠廟在溧陽縣埭頭村祀漢史崇

忠義祠節孝祠俱在府治

二祠所屬縣皆如制

焦千之祠在府治焦山

陸丞相祠在府城外鶴林寺祀唐陸贄

李衛公祠在府治甘露寺祀唐李靖

褒忠祠在府治銀山祀宋刺史魏勝

附明章綸重修褒

忠廟記

宋忠州刺史兼山東路忠義軍都統制知楚州魏公勝及金徒單克寧戰於淮陽無援死之詔

贈保寧軍節度使諡忠壯立廟於鎮江府京口鎮錫號褒忠官其二子重死節也年代既久廟乃隳本朝正統

中郡守郭濟乃重創而歲祭之天順壬午郡守四明姚堂見是廟復壞乃捐俸倡募經始於是年秋八月甲子

落成於冬十一月癸巳於是規模氣象煥然可觀將立石為碑走書徵予記而銘之以垂永久余按宋史列傳

魏公勝字彥威淮南宿遷人也當二帝北狩高宗嗣位張韓劉岳諸將竭忠報國公生於此時多智勇善騎射

居山陽紹興三十一年金兵南下將籍諸路民為兵公躍曰此其時也乃經畫市易課酒榷鹽勸糶聚義士三

百北渡淮取漣水軍諭以忠義遂復海州擒其郡守高文富權知州事自兼都統制而煦山懷仁沐陽東海諸



縣皆定乃蠲租稅釋罪囚發倉廩犒戰士紀律明肅如  
 宿將益募忠義圖收復遠近響應得兵數千取沂州殺  
 其守降其眾三千得器甲數萬金遣蒙恬鎮國以兵萬  
 餘攻海州公出兵迎戰於新橋大敗之殺鎮國軍聲益  
 振傳檄山東招諭結集以待王師之急公提兵往救陣於  
 山下遇金兵伏發以五百騎圍數重公單騎以大刀馳  
 突肆擊陣開復合移時被創冒刃出圍馬踏步而入若  
 無敢當者若中絕水公默禱而雨作又度金兵必復攻  
 海州乃間出若趨城中金兵果來兵出戰皆捷為矢所  
 中自鼻貫齒不能食督戰益力金主亮舉兵渡淮分軍  
 攻海州公與沿海制置使李寶帥舟師邀擊於膠西之  
 唐島又獲金兵之在舟中者殺其將鄭家僕等既還為  
 捍禦固守計金兵又來攻公拒却之始奏公授閣門祇  
 候知海州兼山東路都統制招集山東忠義激勵士卒  
 竭力捍禦金兵至望見魏字旗即走又厚遇金謀者及  
 恩惠來歸人目山東河北歸附日眾金遣山東路都總  
 管以兵十萬攻海州公率眾合李寶軍大破之金又遣  
 五斤太師發諸路二十餘萬來攻海州公擇捍士三千  
 餘騎拒於石闕堰鏖戰殺數千人拒却其圍城之兵又  
 大戰斬首不可勝計轉閣門宣贊舍人充山東路忠義  
 軍都統制兼鎮江路前軍統制仍知海州後被讒於督

府罷其職既而知其誣復之仍遣還海州鎮撫改忠州  
 刺史公在軍未嘗一日懈弛築城浚隍塞隘恒如寇至  
 又自創如意戰車數百輛砲車數十輛乘戰輜重行止  
 禦敵進退俱利上其製於朝詔諸軍遵其式造焉孝宗  
 皇帝隆興二年以議和撤海州戍命公知楚州時和議  
 未决金兵乘其懈以舟載器甲糗糧詐稱運糧往泗州  
 自清河口出欲入淮公規知之身率忠義士拒於清河  
 口勝負未决金徒單克寧帥生兵至公與之力戰告急  
 於都統制劉寶寶不之救公矢盡謂士卒曰我當死此  
 遂中矢墜馬卒年四十五事聞詔加贈諡立廟祀之又  
 官其二子郊忠州刺史昌承信郎於乎臣子負忠勇之  
 氣報君父之讐不幸失援而罹死難若魏公者人豈以  
 死視之哉將事之如長生焉何也以其憤痛切之心天  
 於死生之際雖死猶不死也而其忠憤痛切之心天  
 民彝之懿是以感動後人錫之廟祀雖至於千萬世之  
 遠事之如一日此人心之所以不死也於乎其烈矣哉  
 銘曰忠臣奮勇創義興兵敵王所愾恢復邊城遠近響  
 應赫赫厥聲招降救難莫之敢膺屢敗厥寇為其背盟  
 戰不顧身竭力推誠屹為保障長城可名議和中沮猶  
 力戰爭不幸無援死於忠貞綱常正理於此不傾天經  
 地義金石是銘贈諡立廟世祀其靈一時之死萬古之生



表忠祠在金山祀宋韓世忠魏勝

周濂溪祠在府城南門外鶴林寺西祀宋周敦頤

楊文襄祠在京口驛西祀明楊一清

靳文僖祠在府治祀明靳貴

丁公祠在府治白龍岡祀明丁機

沈公祠在府城治安坊祀明死倭寇難指揮沈宗玉

羅公祠在府治虎踞坊祀明死事羅明昇康熙四十四

年

勅賜奮勇致身四字扁額

唐公祠在京口皇華亭右祀明唐侃

閔子祠在丹徒大乙都

林仁肇祠在丹徒縣因勝寺

范文正公祠在丹徒縣學尊經閣

二程夫子祠在丹徒縣高橋

尹和靖祠在丹徒縣鶴林寺西

朱子祠在丹徒北固山祀宋文公

文信國祠在金山祀宋文天祥

宗忠簡祠在丹徒縣學內祀宋宗澤

石校理祠在丹陽縣治前祀宋石延年

陳少陽祠在丹陽北門外祀宋陳東

附

宋劉宰記

建炎三年

春詔贈故太學生陳東承事郎仍官有服親一人夏四月幸金陵道京口詔曰陳東嘗奏封事出於忠義大臣涉私力請誅戮朕深悔之已追贈京秩今行經其鄉未忘於懷可特賜錢五百貫文又謂宰臣曰張慤古之遺



直陳東誅死可念二人皆葬郡境已降親劄令有司致祭卿等更卹其家紹興四年冬再貶南京用事之臣詔曰朕建炎卽位之初昧於治體聽用匪人置陳東於極典朕甚痛之雖已贈官推恩未足以稱悔往之意可特贈朝奉郎秘閣修撰更與兩資恩澤仍撥賜官田十頃某伏讀聖詔流涕太息而言曰自古人主激一時之忿而輕用其威者有矣未有事非已意悔自己興拳拳不釋如我高宗皇帝者也自古臣子不幸而死非其道者有矣未有寵被九京澤流後裔赫奕光大如我修撰陳公者也公方被執時索紙作書辭其家人雍容曲折如平時末曰死生命也切勿念東識者謂賢於范孟博臨終之言遠矣故人四明李猷爲殮於所攜棺鄉人胡中行護視之以達於家時人高其義公死而事浸聞言益驗上追用其言屏汪黃於散地引咎責躬選賢於衆用能盡屈羣策弘濟艱難贈卹之典殷勤懇惻載在簡編蓋惟恐天下後世之不聞以自同於飾非拒諫者顧諱晦其事謂爲臣子之所當然始未知我高宗之所以聖也慶元中三山陳君德一分教京口謂古者鄉先生沒而祭於社又古者孔顏孟未奠位學者必釋奠於其國之先師若修撰陳公非京口所謂先師鄉先生者歟社非職所及學非吾事歟乃肖公像祠之孔子廟西序陳君代更繼者屏去今教授番陽許君溪視事甫浹日祠

之如故又慮廢興之不常屬某爲之記某聞而歎曰昔人有言死之日是非乃定若修撰陳公之事是非豈昧昧然者而祠宇興廢猶反覆於百年之後况當時縉紳於朝廷之上者其能公是公非歟詩曰憂心悄悄慍於羣小於此益歎國是之難明人心之難一我高宗之聖不可及故拜手稽首而爲之記

陶貞白祠在金壇縣陶村祀梁陶弘景

七君子祠在金壇縣學宮旁祀明死節鄧蕃錫徐有聲

王明汲馮厚敦王榮圖王汝紹王明灝

南北朝宋興寧陵在府東三十五里雩山武帝皇考陵也

趙蕭二后耐焉

熙寧陵在府文帝母胡太后所葬

齊永安陵在丹陽縣東北三十里齊高帝皇考妣所葬

泰安陵在丹陽縣北二十五里齊高帝及昭皇后合葬



此

修安陵在丹陽縣東北三十六里金山下齊明帝皇考妣合葬此

景安陵在丹陽縣東三十一里齊武帝所葬

興安陵在丹陽縣東十四里齊明帝及敬后所葬輿地

志齊諸陵在故蘭陵東北金牛山四時公卿行陵乘舩

艫自方山由陵口入蘭陵升安車輶傳驛置以至陵所

梁建陵在丹陽縣東北二十五里東城村武帝葬皇考文

帝於此獻后祔梁大同元年作石麒麟自京口由曲阿

至陵所近陵二十餘步忽如躍走狀時以為瑞帝不悅

終有侯景之亂大同十年武帝謁建陵有紫雲陰覆陵

上帝望陵流涕所沾草皆變色陵旁有枯泉至是流水

香潔

修陵在丹陽縣東二十一里皇業寺前梁武帝及德后

並葬此大同十年帝謁建陵畢辛丑至修陵詔曰朕違

桑梓五十餘年展敬園陵但增感慟園陵職司供事勤

勞各賜一階并加頒賚

莊陵在丹陽縣西鍾離村白鶴山

漢荆王劉賈墓在府治後圃

孫鍾墓在丹陽縣西鍾離村白鶴山

董永墓在丹陽縣延陵鎮南

會稽太守左恢墓在金壇縣北十八里子忠墓在縣南



十八里

溧陽侯史崇墓在溧陽縣北三十里埭頭村

溧陽侯陶謙墓在溧陽縣西南大石山之陽

〔三國〕吳高陵侯韋昭墓在金壇縣西北六十里東溪

魯肅墓在府城東

撫陵侯史嵩墓在溧陽縣埭頭村

〔晉〕左思墓在金壇縣

東海王越墓府城南二里 刺史殷仲堪墓在府城東

郭璞墓卽石牌山江中三石峯也水漲不能沒如浮玉

然

太尉郗鑒司空郗愔墓並在府城東陳永定中有人發

愔塚見愔尸如生得古銅器十餘有鄭康成所書箴左

氏膏盲愔手注其後云得之廣固鄧伯道

中郎郗曇墓在府城東

太傅褚裒墓在府城南七里

司徒蔡謨墓在丹陽縣南四十里石城鄉

尚書左丞董憲墓在丹陽縣東南六十里楊西村憲永

之子

太守袁宏墓在金壇縣西十五里

僕射王舒墓在溧陽縣治

〔南北朝〕宋廬陵王義真墓 衡陽王義季墓並在府城東

刺史蕭思話墓在府北京口



司空徐羨之墓在金壇縣西南二十五里

梁尚書范雲墓在溧陽縣東北五十里甓橋

唐扶陽王桓彥範墓在丹陽縣東下墅村

處士張祐墓在丹陽縣東北二十里

御史儲光羲墓在金壇縣莊城東村

經略使戴叔倫墓在金壇縣南三里碑存

開國侯史靜滋墓在溧陽縣東北埭頭里又溧陽男史

務滋墓亦在埭頭里

南唐徐知諫墓在府黃社村 李從諫墓在府南望城岡

沈彬墓在丹陽縣沈山彬晚年手植一樹識葬處後卒

掘地一石槨舉棺就之廣袤中度

宋轉運使蘇舜元墓在府五老山蔡襄銘

長史蘇舜欽墓在府石門村歐陽修銘

翰林學士蘇紳墓在府峴山 待制蘇攜墓在府長岡

丞相蘇頌墓在府五州山北阜曾肇銘

通判蘇京墓在府長岡游酢銘

學士刁約墓在府白兔山

大中大夫陳汝奭墓在府黃山

朝散大夫俞希旦墓在府釜鼎山

朝散大夫俞康直墓在府京峴山西

丞相陳升之墓在府五州山

左丞王存墓在府仙風里曾肇銘



祠部王介墓在府黃社村

學士王漢之墓在馬鞍山學士王漁之亦葬此

光祿王罕墓在府永安里 郎中米芾墓在府長山

觀文殿學士宗澤墓在府龜灣

尚書左丞鄧潤墓在府下瀛塘

秘書郎黃伯思墓在府招隱山

侍郎劉逵墓在府汝山

學士趙野墓在府圖山之陽

開府儀同三司詹文墓在府白兔山子度學士亦葬此

今其族居縉雲

節度使趙文亮墓在府朝陽門外轉水灣死王事勅葬

知州陳廣墓在府招隱寺東死王事勅葬

學士邵必墓在丹陽縣耿岡

贈修撰陳東墓在丹陽縣尚德鄉桐村

都統制魏勝墓在丹陽縣經山隆興二年戰死清河口

招魂葬此

制置使汪立信墓在丹陽縣元兵南下立信為沿江制

置使拒守死之部將金明營葬於此

三孝女墓在丹陽縣大泊西嘗以裙裹土葬母

學士張縝墓在金壇縣方山

侍郎張慤墓在金壇縣上元鄉張原

叅政張綱墓在金壇縣西希墟



大學士湯鵬舉墓在金壇縣東小墟

孝子王康墓在金壇縣王莊村

丞相虞允文墓在溧陽縣下菴村

丞相陳康伯墓在溧陽縣丁溪

丞相馬廷鸞墓在溧陽縣車門里

行省副使狄英墓在溧陽縣胥渚村

元翰林學士青陽夢炎墓在府定波門外鳳凰山

僕哈喇普花墓在溧陽縣北沙漲村普花封高昌郡公

家於溧陽後死王事諡忠愍其子雲中郡侯僕文質裔

孫吏部尚書僕篤哲禮部尚書僕斯墓並在沙漲村

明安遠大將軍繆大亨墓在府城西永興寺側尚書詹同

奉勅表墓

侍郎費閏墓在府白兔山

大學士靳貴墓在府長山

大學士楊一清墓在府西大峴山

閻圮墓在丹陽縣觀音山有碑

尚書儲懋墓在丹陽縣南千石墟

尚書沈固墓在丹陽縣東石羊子

尚書姜寶墓在丹陽縣西三十里

按察使賀邦泰墓在丹陽縣荆城港

尚書賀世壽墓在丹陽縣荆城港

都御史虞謙墓在金壇縣丹陽門外



都御史于湛墓在金壇縣官坊村西

都御史王樵墓在金壇縣南青岡墩

國朝大學士張玉書墓在府南尤區村

布政使于朋舉墓在金壇縣十里

知縣荆其惇墓在金壇縣黃塘

侍講馬世俊墓在溧陽縣

翰林史鶴齡墓在溧陽縣

大學生傅貴墓在溧陽縣

大學生傅貴墓在溧陽縣

大學生傅貴墓在溧陽縣

江南通志卷三十九終



